

ርኢሰ ኬንዩ ዊልያም ሩቶ ዲብ ኤረትሮፖ ዝያረት ወደ

ርኢሰ ጅምሁርየት ኬንዩ ዊልያም ሩቶ፡ ርኢሰ ኢሳይያስ አፈወርቂ እብ ወደየ እግሉ ዐዘመት እት ዮም 9 ወ 10 ዲሰመበር ዲብ ኤረትሮፖ እትለ ወደየ ዝያረት፡ ኤረትሮፖ ወኬንዩ እትፋቅ ሕበር አፍገረዩ።

እሊ ዮም 10 ዲሰምበር ዲብ ሆቴል አስመራ ፓላስ እግል ወሳኤል እዕላም ለተሐበረ ሸሬሕ፡ ቀድያት ክልኢተን ለደውለት፡ ናይ መንጠቀት ወቀድያት ብዙሕ፡ ክምሰልሁመ ተጃረት ወናይ መንጠቀት መትሰዳዳይ ለክሰሱ።


ዲብ ቀድያት ክልኢተን ለደውለት፡ ርኢሰ ኢሳይያስ አፈወርቂ ወርኢሰ ዊልያም ሩቶ፡ ዕላቀት ኤረትሮፖ ወኬንዩ እግል ትተረድ፡ ክምሰልሁመ ክልኢተን ለደውለት ዲብ እተሓድ አፍሪቀ መትሰዳዳየን እግል ለዓብዩ ዲብ እትፋቅ በጽሐው።

እብ አሳሰ እሊ፡ ክልኢተን ለደውለት፡ መዋጥኒን ምን ወአስክ እትለ ወድዉ ሐረከት ልጠለብ ምኖም ለዐለ አንዝመት ሺዘት እግል ልትረፍ፡ ክምሰልሁመ ክልኢተን ለደውለት ዲብ እተሓድ አፍሪቀ መዓወነትን እግል ለዓብዩ

ዲብ እትፋቅ ትበጽሐ።

ዲብ ቀድያት መንጠቀት፡ ክልኢቶም ሩኣሳ፡ ሸራከት ወአክዶት ሰላም መንጠቀት፡ ክምሰልሁመ አምን ወተጠውር መንጠቀት ቀር አፍሪቀ እብ ሕበር እግል ልሸቀው ወልትጋመው ዲብ እትፋቅ በጽሐው።

መትሰዳዳይ ዲብ መጃላት ተጃረት ወናይ መንጠቀት ህዩ፡ ርኢሰ ኢሳይያስ ወርኢሰ ሩቶ፡ ደሩሮት ጠወሮት ተጃረት ናይ መንጠቀት ወክሰኣት ረኣሰ ማል እንዴ ተአመረ፡ ሓድረት ሓሰት



እብ መባደረት ናይ መንጠቀት ሐል እግል ትርከብ ክም ለኣትሐዘ ሳደቀው እቲ።

እለ ናይ ሰልፍ ዝያረት ርኢሰ ሩቶ ዲብ፡ ኬንዩ ምሰል ኤረትሮፖ ለበ ምሰንዮት እግል አትሐያስ እብለ አሮት እንክር፡ ዲብ አድመኖት ሰላም፡ መስከብት፡ ዐማር መዓወነት ቀር-አፍሪቀ ዶረ እግል ተዓቢ ትነስአ ለህሌት መባደረት ህዩ እበ ዎሮት እንክር ለተአርኤተ።

እሊ ክእነ ዲብ እንቲ፡ ርኢሰ ኢሳይያስ እግል ሕሸመት ርኢሰ ዊልያም ሩቶ ወምሰሉ ለመጽኣ ልኡክ ሐቆለ ወደየ እብ ዕፊ

ዓዓት ለተሌት ዐዘመት ድራር፡ ክልኢቶም ሩኣሰ እብ ውቁላም ሰብ-ሰልጠት እንዴ ተለው፡ እብ እገሮም ዲብ ዐባዩ-ሸዋሬዕ አስመራ ትመሸው።

ርኢሰ ጅምሁርየት ኬንዩ ዊልያም ሩቶ፡ ርኢሰ ኢሳይያስ አፈወርቂ እብ አሳሰለ ወደየ እግሉ ዐዘመት ዲብ ኤረትሮፖ ለወደየ ዝያረት ክልኤ-ምዕል እንዴ አትመመ፡ ዮም 10 ዲሰምበር ትሳርሐ።

ርኢሰ ኢሳይያስ አፈወርቂ ህዩ፡ ዲብ መክረዩ ጠያራት አስመራ እንዴ ሐድረ፡ እብ ናይ ሕሸመት አሰራር ሳርሐዩ።

ጋሽ-በርከ፡ ጅህድ ትሩድ እት አብደዮት ዐዋዲ ዴራይ

እት አቅሊም ጋሽ-በርከ ዐዋዲ ዴራይ እግል ሸኩት ለፈግረ ቀዋኒን ወመምርሕ እብ ከማሉ ፈዓሊ እግል ልግበእ መትፋቀዲ ትቀደመ።

እሊ መትፋቀዲ ለትቀደመ፡ እት ዮም 11 ዲሰምበር እት ባርንቶ እት ገኡ፡ መደረእ ምዴርያት፡ መስኡሊን ከደማት ዓፍየት፡ ወካይል መካትብ ዐመል ወደማነት እጅትማዕየት፡ ክምሰልሁመ ብዕዳም ለክሰሱም ጀሃት እት ሐድረው እቲ ጌማም ወራታት ልጃን አብደዮት ዐዋዲ ዴራይ ቲ። እተ ሀደግ፡ እብ ደረጃት

ምዴርያት ለተአሰሰ ልጃን፡ እት አብደዮት ክሸቦ አዋልድ፡ ህዳይ ሰነት አዳም ለኢበጽሐዩ ወብዕድ ዐዋዲ ዴራይ እቲ ለረከዘ ወራታት እብ ከሰሰ ተውዴሕ ዋስዕ ሐቆለ ትቀደመ፡ መጅተመዕ ለመደረት ለልፍህመ ምንማቲ፡ ለዛህረት ናይለ መዋዲት አሰክ እለ ሰበት ኢበዴት፡ ለልጃን ለልተበዓሁ አግቡይ አትሳናይ እግል ሊደየ እቲ ክምሰልበን ትሸረሐ።

መስኡል ፈርዕ ወዛረት ዓፍየት አቅሊም ጋሽ-በርከ ዶ/ር ሐዩሎም ኪዳኔ ለእብ መዓወነት ወዛረት

ዐመል ወደማነት እጅትማዕየት፡ ወዛረት ዓፍየት ወመሕበር ወጠን አዋልድ አንሳት ኤረትሮፖ ልትሰርገል ለህለ እት አክዶት ሕቁቅ አዋልድ ወአጀኒት እብ ዓመት፡ እት አብደዮት ዐዋዲ ዴራይ ህዩ እብ ፍንቲይ ለረከዘ ጅህድ፡ ምን አቅሊም አሰክ እዳራት ደዋዩሕ ለልትከሬ ዝሞት ልጃን ክምሰል ህለው ሸርሐ።

ኣክም አቅሊም ጋሽ በርከ ሰፊር መሕመድ ዐሊ ሕሩይ እብ ተረቲ፡ ለዐዋዲ ዴራይ እግል አብደዮት፡ ወራታት አትፋዘየት እበይት ካፊ ሰበት ኢትን፡ ለፈግረ ቀዋኒን ወመምርሕ እብ ዋጅብ እግል ልትሰርገሎ ትፋኑ።

መሻርከት ህዩ፡ ለገብእ ህለ ጅህድ ሕበር እግል ልተላሌ መትዛም ልጃን አሰክ ዐደታት እግል ልትከሬ ወመታበዕት እግል ተህሌ፡ መቅሬሕ ልጃን ምሰል ብዕድ አጅህዘት ሕኩመት ወመሓበር እግል ልደቀብ ለልብል ወብዕድ አረእ ወፊናታት ቀደመው።



ከበር እስትሸሃድ፡

እት ወዛረት ዐመል ወደማን እጅትማዕየት ምስኩን ገዲም ሙናድል ተክሌ አርአዩ ሸማንጉሱ፡ እብ ሕማም እት 73 ዕምሩ፡ እት ዮም 11 ዲሰምበር አስተሸህደ።

እት ወርሕ ማዮ 1975 እት ቅዋት ሸዕብየ ተሕሪር ኤረትሮፖ ለተሐበረ ሙናድል ተክሌ፡ እት ጄሽ ቅታል አሰክ እብ ደረጃት ቃእድ ፈሰለት፡ ክምሰልሁመ እት ቅስም ሸኡን እጅትማዕየት፡ እንዴ ትረተበ እግል ሸዕብ ወወጠት እብ መትሰባል ለክድመ መሓርባይ ቲ።

ገዲም ሙናድል ተክሌ አርአዩ፡ በዐል ፈረዕ ወአብ ክልኣት ወላ'ድ ቲ። ዓደት ቀብሩ ህዩ፡ ዮም 12 ዲሰምበር አልዐሰር እት መቃብር መሓርበት አስመራ ተመ'ት።

ወዛረት ዐመል ወደማነት እጅትማዕየት፡ እብ እስትሸሃድ ገዲም ሙናድል ተክሌ አርአዩ ሸማንጉሱ ለትሰመዐዩ ሐዘን እት ሸርሕ እግል ዓይለቲ ወመሊሃም ንዓሉ ኤማን ወሰብር ለህበኩም ትብል።



ሰንወፌ፡ ፈጻልየት መምሬሕ ክራይ ኦብያት ብሕተ ትጌመም

እት ሙዲርየት ሰንወፌ፡ ፈጻልየት ናይላ እብ ወዛረት እዳረት አቃሊም እንዲ ተሓየሰ ለፈግረ ንዛም ራቀቦት እጃር ናይ ብሕተ ኦብያት ለጌምም ህድግ ገኣ።

እተ መስኡሊን እዳራት ደዋይሕ ወወካይል ሽዑብ ለሐድረው እቲ ጌማም፡ መስኡል ውሕደት እጃር ኦብያት እተ ሙዲርየት አሰይድ ዐሊ መሐመድ ሳልሕ፡ ኦብያት መዲነት ሰንወፌ እት 10 ናይ ክራይ ዞናት ክምሰል ልትካፈል እት ለሐብር፡ እሊ መምርሕ እሊ፡ ለለአትአጅሮ ለመሉኩ ኦብያት ክራይ እብ አግቡይ ራትዕ ወእት ወክዱ እግል ልርከቡ፡ ለልትካረው ህዩ እተ እግሉ አጀረው ኦብያት ሕቁቁም እንዲ አድመነው እግል ልንበር ለሰዲ ክምቱ ሸርሐ።

እብ አሳሰለ ፈግረ መምርሕ፡ ለለአትአጅሮ እት ረክሰለ ልትካረው ጨቅዋ ምን ወዱ፡ መክተብ እጃር ኦብያት ቃኑን እንዲ ትታሉ፡ ምስዳር እግል ልንሰእ ሰልጠት ክምሰልቡ

ለሐበረ አሰይድ ዐሊ፡ ለለአትአጅሮ ክሉ ለነሰእዉ ምስዳራት እብ አሳሰ መምርሕ እግል ልግበእ ትፋኑ።

እት መርከዝ ፖሊስ ሙዲርየት ሰንወፌ መስኡል ዳፊያት ጀራይም አሰይድ ኦብርሃም ክፍሌማርያም እብ ተረቱ፡ እት ፍንጌለ ለለአትአጅሮ ወለ ለአጅሮ ለቀንጽ ቅደይ እብ ቀዋኒን መደኒ ወጀራይም ክምሰል ልትረክው እት ሸርሕ፡ ለለአትአጅሮ ለትፈናተ አሰባብ እንዲ ትነፈዐው እትለ ለአጅሮ ለነሱሉ ለህለው ምስዳራት እብ ቃኑን መስኡልየት ሰበት ለአረፍዕ፡ እብ ሕክሙት ለፈግረ መምርሕ ንዛም እጃር እንዲ ጸብጠው እግል ሊግሶ ትላኩ።

መሻርከት እብ ተረቶም፡ አሰክ እለ እት ፍንጌለ ለለአትአጅሮ ወለ ለአጅሮ እትፋቅ ለኢወደው እግል ለህሉ ሰበት ቀድሮ ታዮኖት እግል ልግበእ፡ ክምሰልሁመ ናይ ከርስ እትፋቅ እግል ኢሊህሌ ሙጅተመዕ መታበዕት እግል ሊዲ ለልብል ውብዕድ ረክይ ቀደመው።

ዐንሰቡ፡ እጅትመዕ ዐቦት ስያሐት ገብእ

እት አቅሊም ዐንሰቡ፡ አርዛቅ ስያሐት እግል ጠወሮት እት ሰነት 2022 ለልትሐመድ ወቀይ ሰርጉል ክም ገብእ፡ እት ዮም 4 ወ 5 ዲሰምበር እት መዲነት ከረን እትለ ገብእ ጌማም ተሐበረ።

ምዲር ዓም ፈሬዕ ስያሐት አሰይድ ሳልም ዐሊ እትለ አስመዐዩ ከሊመት፡ እት በቃዕት መአሰሳት ወእንፋር ለሰዲ መሐደራት ወተእሂል ክም ተህየቡ፡ ድቁብ ወራታት መራቀብት ክም ገብእ፡ ሕፍዘት አርዛቅ ስያሐት ወወሰቁቱ ለከሰሰ ወቀይ ክም ገብእ፡ ክምሰልሁመ ወቀሉት ፈዛዐት ዓፍየት ሸቃለ ወመአሳት ለከምከመ ወራታት ክም ትሰርገለ ኦብርሀ።

አርዛቅ ስያሐት እግል ልዕቤ ወዲብ መንፈዐት ሽዑብ እግል ልውዐል እብለ ገብእ ጅህድ፡ ምን መአሰሳት ህይበት ከደማት ዝያድ 16 ሚልዮን ናቅፈ እተይ ክም ትረከበ ለሐበረ አሰይድ ሳልም፡ አሳር ገዲም ወተእሪካይ አካናት፡ አሳር ወአሰልየቱ እግል ኢልብዲ ምስል እዳራት ደዋይሕ እብ መትዐዋን፡ እግል ሕፍዘቱ ክም ልትከደም ሐበረ።

መስኡል ፈሬዕ ሕፍዝ ወመታብዐት ስያሐት አሰይድ አሰፍህ ሀብቱ እብ ጀሀቱ፡ ዲብ ብናእ-ገዲም፡ ተእሪካይ አካናት ዕባደት፡ አሳር ገዲም ወገበይ ሕፍዘቱ፡ ክምሰልሁመ ዲብ ሔዋናት ከደን፡ ዕጩይ ወሕዝዐት እግል ልግባእ ለወጅብ ሕሰር እብ ርከቡ ሐቆለ ሸርሐ፡ ለመጃል ርከቡ እግል ልትሸቁ ዲቡ ትፋኑ።

መስኡል ቅሶም ሩከስ ሸቅል ወመራቀብት አሰይድ ሀብቱጋብር መንግስቱ ህዩ፡ መአሰሳት ህይበት ከደማት ቀዋኒን ወመምሬሕ ስያሐት እግል ልታለዩ፡ እብ ነዳፈት እግል ዐማይል ከደማት ሰኒ እግል ለህበ አትፋቀደ።

ዲብላ ህድግ፡ ለጸንሐ ሩከስ ሸቅል አጀደዶት ወሐዲስ አፍገሮት፡ መራቀብት በቃዕት መአሰሳት፡ እት ነቃስ በቃዕት ለአርአዩ ምስዳር ተሰዩሕ ንስኣት ልትነሳእ፡ አዳላይ ክትብ አትፋዝየት፡ ታያን-ሐዲስ ውድየት . . . ምን ስታት ሸቅል ናይ ሰነት 2023 ክምቱ ተሐበረ።

እት አቅሊም ዐንሰቡ፡ 741 መአሰሳት ህይበት ከደማት ሀለዩ።

ዐመልየት ዌዳት ዲብ እሱብዳልየት ሐሊበት



ዲብ እሱብዳልየት ሐሊበት፡ እብ መዓወነት ኤርትራዩን ወውላድ ቻይነ ላቶም ሰብ-መቅደረት፡ እግል ሰልፍ መረት ዐመልየት ዌዳት ትገብእ ህሌት።

ሚዲካል ዳይረክተር ናይላ እሱብዳልየት ዶክተር ልኡል ባንቴይርጋ እግል ኤሪን እትለ ሀበዩ ሐብሬ፡ ለዲብላ ሸቅል ሻርኮ ለህለው ሰብ-መቅደረት ውላድ-ቻይነ፡ እትለ ሐልፈ ሰኖታት ዲብ እሱብዳልየት እሮተ ወሐሊበት ለትፈናተ ከደማት ለሀይቦ ለጸንሐው ክምቶም እንዲ ሸርሐ፡ ፍንቲት-ዐመልየት ዌዳት ወዱ ለህለው

ላኪን እግል ሰልፍ መረት ክምቱ ሸርሐ።

ዓመልየት ዌዳት መቅደረት-ፍንቲት ለትጠልብ ወሰኒ ክብድት ሰበት ተ፡ መዋዋኒን አሰክ ካርጅ እንዲ ጌሰው እግል ልትዐለጆ ልትቀሰቦ ክም ጸንሐው ለሸርሐ ዶክተር ልኡል፡ አዜ ላኪን እት ከርሱ-ዐድ እግል ልግባእ ሰበት አሰተብደ፡ መርሀዮ ርክብት ክም ህሌት ኦብርሀ።

በዐል መቅደረት ዐመልየት ዐጭም ወአሰዕድ ዶክተር ሰለሙን ጸጋይ እብ ጀሀቱ፡ ደሩርየትለ ዐመልየት ሐቆለ ሸርሐ፡ ለውላድ ቻይነ ላቶም

ሐካይም መጥ-መጦርለ ወድወ ሰዳይት ሕክምን፡ ተጃርቦም ዲብ ኤርትራዩን ዲብ ሐለፎት ሸቁ ክም ህለው ሐበረ።

ዲብ ቅሶም ዐምልየት ዐጭም ወአሰዕድ ዶክተር ምሕረትአብ ዮማኔ ህዩ፡ ለእምቡት ለህለ በርናምጅ፡ መዋዋኒን እት ከርስ ዐዶም እብ ዐውል-ረኪስ ዐመልየት እግል ሊደው ለለአቀድር ክምቱ ሐቆለ ሸርሐ፡ ዲብላ መጽእ እዋን እብ ርከቡ ክም ገብእ፡ ለቡተ ደማን ሸርሐ።

ዲብላ ዐመልየት ሻርኮ ለህለው ውላድ ቻይነ ላቶም ሰብ-መቅደረት እብ ተረቶም፡ አሰክ እለ እግል ሐምሱኤርትራዩን ዕውትት-ዐመልየ-ዌዳት ክም ወደው ሐቆለ ሐበረው፡ እግል ለአተላልዉ ክምቶም አከደው።

ዐመልየት ምንለ ገብአት እግሎም - ካፒቴን ተሰፋማርያም ኦብርሀ፡ ዲብ ከርስ ወጠን እለ ዐመልየት-ክብድት ናይ ዌዳት እግል ትግባእ ሰበት ትቀደረ በክት ዐቢ ክምቱ ሐቆለ ሸርሐ፡ መሻክል ዌዳት ለቦም መዋዋኒን ዲብመአሰሰት ዓፍዬት እንዲ ጌሰው ራድኢት ዋጅበት እግል ልርከቦ መክረ።

ስነይ፡ ሃይበት ክዳማት ባቅዐት ወታመት ክድመት እግል ለሀቦ አትፋቃድ ገብእ

ዲብ ምዴርየት ሰነይ ለህለዩ መአሰሳት ህይበት ከደማት፡ ባቅዕ ወታምም ከደማት እግል ለሀቦ እብ ነሻዋ እግል ልትከደም፡ መስኡል መክተብ ስያሐት አሰይድ ተኽሌሀይማኖት እመሃ አትፋቀደ።

እግል ኤሪን እትለ ሀበዩ ሐብሬ፡ አሰይድ ተኽሌሀይማኖት፡ ዲብላ ምዴርየት ዲብ ሰለስ ደረጃት ለትካፈለዩ 360 መአሰሰት ክም ህለዩ፡ ለአግደ ሸቅል ናይላ መክተብ ህዩ ምስል መሸተርከት እብ መትዐዋን በቃዕት ህይባሁ ከደማት ራቀቦት፡ መታበዕት አርዛቅ ስያሐት ወወቀሉት ፈዛዐት መጅተመዕ ክምቱ ሸርሐ።

መዲነት ሰነይ ምስለ ባቱ

ሐረከት ተጃረት፡ ብዝሐም ጋሽ ሰበት ትትሐደር፡ መአሰሳት ህይበት ከደማት መምሬሕ ናይ ውዛረት ስያሐት እንዲ ተበዐዩ ከደማትን እግል ለአትሐይሰ ላዝም ክምቱ፡ አሰይድ ተኽሌሀይማኖት ሐበረ።

ዲብ ፈርያት ቀበት ዐድ፡ ዲብ አጅናስ ስተይ ለልትርኤ ቀለ እግል ልትከረዕ፡ ምስል ሰብሸርከት እብ መትዐዋን ምስዳር-ቃትኒ ልትነሳእ ክም ህለ እንዲ ሸርሐ ህዩ፡ ለአግደ ሰብላ ሕዲን ናይላ ብዳዐት ሰበት ቱ፡ መፍርየት ላተን መአሰሳት ሕሰር እግል ለሀባሁ ትላኩ።

ዲብ መዲነት ሰነይ፡ ዲብ ሸዋሬዕ ምን ቃኑን በረ ላቱ ከደማት

ለሀህይበ መአሰሳት ዐደደን እት ወሰክ መጽእ ሰበት ህላ፡ ለለአተልዩ መሻክል ዝያድ እንዲ ኢልትኬለም፡ እዳረትለ ምዴርየት ሕዱድ እግል ቲዲ ዲቡመ ሊከ ቀደመ።

መስኡልት መሕበር ህይበት ከደማት ስያሐት ምዴርየት ሰነይ አሰይደ ምሕረት አማኑኤል ወነፈር ለመሕበር አሰይድ መግስ ገብረህይወት እብ ጀሀቶም፡ ምን ቃኑን በረ ከደማት ለሀህይበ መአሰሳት መራቀብት እግል ትግባእ ዲቡን፡ እብ መወዝዐት ለልትህየቦም ስተይ ሕዲን ሰበት ቡ ለልትወሰክ እቡ መጃል እግል ልትከሰት፡ ቀድየት ከደማት ካህረበት ህዩ ሕሰር እግል ልግባእ ዲቡ ትፋነው።

ዌለበርዕድ፡ በርናምጅ ሕፍዘት ማይ ወትርበት

እት ሙዲርየት ዌለበርዕድ፡ እትለ እተ ህሌነ ሰነት እብ ዛይደት መሻረከት ሸዐብ ለልትሐመድ ወራታት ክምሰል ትሰርገሉ፡ እት ዮም 7 ዲሰምበር እት መዲነት ኤደን እተ ገኦ እጅትማዕ ትሸረሐ።

እብ አሳሰለ ትቀደመ ተቅሪር፡ እብ ጀምሶ 173 አልፍ ነሐር አዳም ለሻረከ እቱ፡ ሐድ 2 አልፍ ምትር ሙከዐብ አክረት እት አራዲ ሐርሴ ዝያድ 71 አልፍ ሙከዐብ ህዩ እት አወድግ፡ ክምሰልሁመ ሐድ 98 አልፍ ምትር አሸረዐት እት አራዲ ሐርሴ ዝያድ 60 አልፍ ህዩ እት ቀትራ ክምሰል ትሸቀ ትወደሐ።

እተ ምዴርየት 12 ከዋን ወፅ ሸርም፡ እት አድመኖት ማይ ሲቶ ዶር ዐቢ ለአገዱ ክምሰል ህለው ለበዝሐ ዐዶታት ህዩ መትነፈዐት ማይ ሲቶ ክም ገኦ ልትሸረከ እት ህላ፡ እተ ተርፈዩ ዐዶታት ሕድ ለሽብህ ካድም ልትሰርገል ክምሰል ህለ ወሐድ 40 አልፍ ሸትል ክምሰል ትሸተለ አሐበረ።

መሻርከት እብ ተረቶም፡ መሻረከት መዕያ እት አሰነዮት ወአትሓየስ ብንዩት ተሕትየት መዳርስ እግል ልደቀብ፡ እት ኸዋባልዋ-ዌለበርዕድ መጋድዕ ምዋሰላት ሕሉል እግል ልግበእ እሉ ለልብል ውብዕድ አራእ

ቀደመው።

መመቅረሓይ ሸቁል ናይላ ሙዲርየት አሰይድ መሐረን ተኽልኣብ እት ደንጎቤ ኬወ ሕበር ዝያድ እግል ልተላላ፡ ከደማት ማይ መዲነት ኤደን ወእዳረት ደዋይሕ ሐሊብ-መንተል እት ጣቀት ጸሓይ በደሎት፡ ጽርግዩ ሐሊብ-መንተል- አድርባ አትሓየስ እግል ልግበእ እሉ፡ ወራታት አደቀቦት ነዳፈት ድዋር፡ ክምሰልሁመ ወዘዎት አራዲ ጤሳ እት እዳረት ደዋይሕ ዐድብርበሬ ውብዕድ ምን በራምጅ ሸቁል 2023 ክምቱ እት ሸርሕ፡ እግል ልትሰርገል መሻረከት ክሎም አጅህዘት እግል ሊዚድ አትፋቀደ።

ጸረተርዮ፡ ዐጽዳሽ

ክል አርቡዕ ለትጠ'በዕ ጃሪደት

መዳልያይ፡-
መሐመድ እድሪስ

ለይኣውት ወአርተዎት
* ዘህረ ዐሊ
* ፋዋን ኣድም

ተለፎን፡ 121797/07121322
ፋክስ፡127749፡ ዕ.ሰ.ቡ፡ 247

ተውገሰ ጃሪደት፡
ተለፎን፡ 200454

እትአመርት፡
ተለፎን፡ 125013፡ ዕ.ሰ.ቡ፡ 1284

አን ወወለቼ እምነ ሐቲ ! !

ዕንዋን ክቲብዬ ለአትፊክር ገብኧ!! “አይወ እምበል ሸክ” ንኡቫይ ገማም እት ኣነ ምን ንእሽዬ እብ ግርመት ጠቢዐት ሰኒ እትፊክር ወእትዐጅብ ነበርቲ። ላመ ጠቢዐት ክእኒ ክምሰል ኣዜ ሁትልት ወቡትርት ይዐለት። ስሩጊት ወዑርርት ተ ለዐለት። ሐሰያተ ወረወራተ። አድብረ ወጋድሞታት ሀንን ተ ትብል ለዐለት። አይወ፡ ሰኒን በዲር!! ሰኒን ግምዬ ለንኣይሸ፡ ወግም ዋልዳንዬ ለሸባባት፡ ሰብ ዕመም ወሰማዲት። ፋጠት፡ ነኒ ወሀርድ ልባስ እማቼ ወሐዋቼ አውኪራት። አናመ ምን አዳምዬ ዝያድ ፍክር ለዐለ እግልዬ ኢመሰለኒ። ላኪን እልሃምዬ ሰቡት ገብኣቱ ለእበ እትፋጠነ ለዐልኩ። መስጢር ግርመት ህዬ፡ ዎሮት ካልቅ ለለዓርረ ወሰራግዩ ክምሰል ህለ እምበል ሸክ አምር ዐልኩ። አቡዬመ ወእምዬ እግለ ናዩ እንትበህ ልብ ከሩ እቱ ሰበት ዐለው። ሰማቼ እት ረፍያ “እሊ ላቱ ወልነ ኢኮን ገሌ ለኢትደለ መስጢር ህለ እቱ ረቢ ልግበእ እቱ” ልብሉኒ ዐለው። ምስለ ናይ ጽብሕ ምድር ሸርቀት፡ አሰክ ከልወቼ ቱርቱር እት እብል አገዌሕ ዐልኩ። ክልኤ እግርዬ እበ ሐምዳለ ፈጅር ቀሚሳዬ ለትሓቱ ጠብስ ወእት ከልወቼ እመጽእ ዐልኩ። እት ገበዩ ላኪን ለእግለ እፈቱ ግርመት ጠቢዐት ሰኒ እት እትፋጠነ ሄርር። አዜመ ተፍኪርዬ ወተዐጅብዬ እት ዘይድ እተ ገበዩ ኬን ወእንሰር አተላላ። እግል ክሉ መክሉቅ ጠምጠም አልሓት እት አዳውር እግለ ዕለታይ ዳዩ ገበዩ እሳይር ዐልኩ። አጩዩ፡ ሰራይራ፡ አንወዩተ፡ ለዳሊ ሰዐራ፡ ለጋምል ጋድሞታተ፡ ለዑሩር አድብረ ለጀርወን መሓዛት ወአወድግ፡ ለዕመር አፍያት ወለ አድሕድ ለአተቅብል መኣቲት፡ ለደገጊት ሚ ወሚ ገብእ እግል ኢበለኩም!! ለሀ ክምን ለሀ ተአትፍክረኒ ዐለት። እግል እሊ ናዩ እንትበህ ልብ ለከረው ዋልዳንዬ ለሞተ ረቢ ልርሐሙ ወለ ህለ ዓፍየት ለህቡ እግልዬ፡ አክለ ረአውኒ ልምድ ከፊኒ ይዐለ። እብ ፍንቱይ አቡዬ ለርሐም ገዱ አዜ እንዴ ገብኣ ልትርኢኒ። አክለ ሰማቼ ትርፈዐተ፡ “እናስ ዐቢቱ ወመፋርቁ ብዙሕ ረቢ እግልነ ሊደዩ እንዴ ኢኮን፡ ለአተቅሳዩ ልብክ ኢከርዩ! ከንዶእ? ልብል ዐለ። ላመ አሰክ ከልወት ለነድአውኒ እቡ ሰብብ ዝያድ ሐውዬ ለእቼ ልትዘፍኑ ለዐለው ዛይድ እንትበህ ሌጣቱ። በህሉቶም ንኡሽ ክም ንኡሽ እንዴ ገብኣ ከሐቀ ህም አለቡ ኢገብኡ፡ እተ ወቅት ለህይ ዋልዳኑ ኢፈቱወ እግሉ። ሸር ሓሰድ ዐድ ወከደን ህዩ ፈርህ እቱ። ፍላን አልባቡ ብዙሕ ቱ ሸር ልክልኡ” ልትበህል ዐለ ልትዘከረኒ።

ለግርመተ ጠቢዐት ላኪን ግርመት ከርስ ትህይወኒ ዐለት፡ ለለትዐጅብቱ ሸር ግርመት ፍክር ወዐቅል ሕልም እብ ሰኔት ናይ ክል ዶል ሴፈ ወዝዋደት አርወሐቼ እት እንቱ ነብር ምስልዬ ዐለ፡ ወሀቱመ ምስል ዕምርዬ እት ወሰክ እርእዩ ዐልኩ። መትፋጣን ወመትመራማር እበ እት ደሚርዬ ሕቦሶ ለዐለ ዎሮት ዳይ አምዕሉ እንዴ ጸንሐ ልትጸበር ዐለ።

ለለአትፊክር ጋር ህዬ፡ አዜመ ሐዲስ ቱለል ትሓበሬኒ። ምን ሻም ግርመት ጠቢዐት ሻም ትርበት ሞዳዩ ዲብ ሕልም ላሊዬ ወአምዕልዬ ትባረኬኒ። አይወ፡ ሞዳይ አብዕሶታቼ ወአቦታቼ፡

አበውዬ ወእማቼ ሰልፍ እብሃዘቼ እት ሐያት ክልኤ ዕንቼ ለፈትሐዩ እቱ ወእትብዬ ለትቀረጨት እቱ ሞዳይ። ሰልፋይ ሞዳይ!! ዐጅብ! ክእኒ ክምሰለ እግለ እብለክምቱ!! እብ ክሰብ እሊ ሓርያይ ሸር ለአምሩ ጋር ሐቱመ ይዐለ እግልዬ፡ ላኪን ህቱመ አመት አለበ እት ከርሰዬ ናተብ ወሰብብ ወሻም ወጠን ክምሰልቱ አነ እግለ ኖሼ ሐቱሁ እንዴ ይእፈርግ፡ በርህት ሐያት እግል ልርኤ ምስል ዕምርዬ ሰፍታት ዐለበ። እብ ክሰብ ወጠን ወወጠንዮት ላኪን ሐቱመ አምር ይዐልኩ። አማን ተሐይሰ ከእኒ ክምሰለ እግለ እብለክምተ። ላኪን አነ እግል ኖሼ ክምሰል እሊ እግልዬ ነገብ ነገብ ለአብለኒ ለዐለ ጋር ሻም ወጠን ክምሰልቱመ ሐሬ ምስል አዳምዬ አመርኮ ወፈረግኩዎ።

እምዬ ክምሰል ክሉም ሐውዬ እግል ትጣሰኒ ወትሻምሊኒ ወምነ ለኢትንጽፍ ቅዝር ሻከት ረሐመተ እግል ትመውኒ። ወእተ ሐኒን ነሐረ እግል ተሐራገዐኒ። ምንመ ሐዜት አነ ነፍሼ ነገብ እት እጸብጠ እረይመ ዐልኩ። ሰኒዲ እወዴ ይዐልኮ ረቢ ልሳምሐኒ። ላመ ልብ ዋልዳን ከርዩ ለይዐለ ከረ እሉ መስል ቱ። እግል እሊ ሕቦሶ ናይ ከርሰዬ ሸር እብ አምዕሉ አብሀዘ። ህቱመ ክምሰልዬ ሸማል ወበርህት ሐያት ረአ።

ሐቱ ምዕላይ አርድ እብ ጽብሐቱ አሰከለ ነገብ ለዋልዳንዬ ፈርህዉ ለዐለው ሞራዬ ትማጤት ወቅዳመት አሰእንዬ ዋጨኮ ወክባባይ ገብኣኩ። ዋልዳዬ ምድር ወሰመ ምን ሕሊል ሾመት ጨበ እቱ። እምዬ ላኪን ጽልመቱ ወበርህቱመ ሐቱሁ ኢፈረገት። ግሞሬ ወአያይ እበ ናዩ በደ ወምግደስ ሰኒ አሰፎም እት ሸርሒ፡ ሓለት ዋልዳንዬ ላኪን ለኢትርሄ ሰድት ዲመ መስለት እቶም። ህቶም ምን መሻቀላቶም ወሀለጎም ተሀለገው። እብ ክእኒ መግልስ ህዩ ለአትሓጠሮም ወሰጅዕምዎ ልትሰምየ ዐለው። “ግድም ሚ ቱልኩን ረቢ እት ሸፍር ልፍተዩ ወለዓይሩ። በዲርመ ምን መዋዲቱ ልብክም ካርሁ ሚዶል ዐለ። አዜ ህዩ ምን ሀላግ ወገለበት ለትትረከብ አለቡ” እት ልብሉ ለአትሓጠሮም ዐለው።

አናመ እብ ዕምርዬ ንኡሽ ሰበት

ዐልኮ እሰልፍ እት ጢሾ ምህር ትዐገልኩ፡ ሐር ምስል ወቅት ዕምርዬ እት ወሰክ ሰበት መጽኡ፡ እት ሰዋትር ፍራሰ እግል እትሓበር በክት ሀቤኒ። እብ ክሰብ ወጠን ወወጠንዮት አሌፍ ክምሰል እቤ፡ ክሉ እሊ ለእት ደሚርዬ እንዴ ተሐበዐ ዳርከኒ ለዐለ ሸር ፍቲ ወጠን ክምሰል ቱ አመርኩ። “ሚ ትቤ!! ክምሰል ትብሉኒመ አምር ህሌኮ ላኪን፡ መዳግምዬ ክምሰል እሊቱ ለዐለ። ምስል ወቅት ህዩ ለሰፈላል ወለ መሻቀለት ሰኒ እንዴ ነቅስ ምን ደሚር ዋልዳንዬ እት ገይሰ መጽእ ዐለ። አነ ላኪን ምን ሸር ሐቆም እት እፈርህ ወእግለ ሰንዬ ወመዓቢቼ ወለ ሰልፋይ ሞዳዬ እብ ሰፈላሎም አደሐ እት መውዕልዬ ወላሊ እት ምምያዬ ልትባጠሩኒ ዐለው።

ላመ እግሉ ትፈረርኒ ዳይ ወጠን እብ ሰደደት ወሕርየት ወጠን ደንጎባሁ በጽሐ። ምነ እቱ ንጉሳም ለዐልነ ነገብ እት ሸፍር ዓርኩ። አዜመ ዋልዳይቼ እግል ትሐራግዐኒ ወትጣሰኒ ወዩአቤት ላኪን ግድም እናስ አክል አብሁ ሰበት ገብኣኮ እበ ርሒማት አጩብግተ እግለ አርሓተ እግርዬ ትጫቅም እግልዬ ዐለት። ወቅት ዎሮት ህዩ እት እትሃጅክ ወቅብላተ እተ ዐራት እክፍር እት ኣኑ፡ ክርሲ እንዴ ነሰኦት እበ እንክረ ረአሼ እንዴ ትገሌት እግለ ናይ ሸምለ ጭጌራቼ ትሸምለን እግልዬ ዐለት። እብ ደሚረ ህዩ ምን ሐቅ ውላድ ገሌ ምን ዋልዳኑ ዴን ታርፍ እተ እግል ኢለሀሌ ትፈርህ ትመስሰኒ ዐለት። አነ ላኪን እበ ለእግለ እምበል ምራዶም ጊሰኮህ አርወሐቼ አትዐገብኩ።

ምነ እቱ ፍሩር ለዐልኮ ዳይ ወጠን ሐቱ እግልዬ ለትመስል እግል ሸርከት ሐያት ለሐሬኮህ ወምስለ እበ ክልኦት ለዋልዳን ለትደሐረ ህዳይ በኪት ሰዒድ ወዴኩ። ላመ ሕራት ምን ሰፍተ እብ ክሉ አውሳፈ ግርመት ወጀማል ለአክመሰት ሸርከት ሐያቼ ወእም ውላጄ፡ እግለ ናይነ ሸርከት ለተአደቅብ ብክር ወዳግም እት ትብል እግል ሐያትነ አሳሰ ኬር ወበርከት ምን ውላድ ከሬት እግሉ። እለ መፈተይ ዐድ አብህ ወሐምሀ ላተ እም ጼወዬ እግልዬመ ሰኒ ሐበነተኒ። ምን አሪምኮ እብ ዳር

ወሸፍር ጸንሐተኒ። ምን አቅራቢ እብ ገጽ ፋርሕ ወውላድ ሳልሕ ወኤታን ናጅሕ ትመቅረሐተኒ። አናመ ግድም ክምሰል ክል መዋዋን እግል መናበረቼ አሰኔ ዲብ ትሉሉይ ሰዐይ ኬን ወእንሰር ተሐርካት ወዴኩ።

አይወ፡ ሰኔት ምስል ግሞሬ መርትዓይት ሕጉዝ ወዩቲም ለእት እደይ አዳም ልትለዋሌ። ምሕሰነት እግል አያየ ዐድ አብ ኢትብል ወዐድ ሐም። መሐርባይት እግል ጋሽ ኢትትጸበር ምንክ እለ ውደይ፡ ክሉ ክምሰል ሸንሂቼ ትወድዩ ለሕራት ምን ሕሩያት እንዴ ሸነት ተአሸንን፡ እግል ንዮቼ ትድሌ ወምራጄ ተአተም።

እብ ክምሰል እሊ እግለ ደገምኮ እግልክም እብ ውፋቅ ወመራሐመት ወሐሸሞት አሕድ እግል መንበር እብ ዎሮት ትልም ወዎሮት ኤታን ረአሰነ ቀደም ሄራርኒ አተላሌኒ። ሰነት 2008 እለ ለእግለ እፈቱ እም ጼዋዬ እት ቤት ሕርስ እት እንተ መልክ አልሞት ረአሼ እንዴ ኢትብል፡ ሰር ላሊ ሰላም ወዐሌክም ቤለዩ። እተ እግሉ ሓቅፈት ለዐለት ዕንቃቅ እቱ ኢረሐመ ወለ ፍንጌ ክሊነ ለዐለ ሻም ክልኦት ሰብ ፈረዕ ኢትካለቤ እበ ረቢ ቤለዩተ እበ ሐክመ። ወሞላዬ ሐቅ ወደ!! ሐያትነ በዲረ እግል ፈነ ለትከለቀት። ላመ ምነ ሐቱ ሳምን እንዴ ኢለአደውር እሙ ለትፈንቱቱ ዕንቃቅ ምኑ እብ ሐድ ትዐቤ ለዐለት (ሰኔት) ወለቼ ጥብተ ለጸብረት እንዴ ኢኮን፡ ዝያደት ምን ምንኣሽ ህታተ ለረሐመት ዋልዳይት ትሐዜ ለዐለት። ክምሰለ እግለ እቤ ላኪን አዜመ ለመክሉቅ ሐቱመ እግለ ወዴ አለቡ እምበለ ረቢ ቤለዩ ወፈተዩ። አጃል ህዩ ፍንጌ ፋቲ ወፍቱይ፡ ፍንጌ ዋልድ ወውሉድ እተ ለትሐደደት እግልነ ሳዐት ተለው ወዴኩ። ላመ ንኢሽ ለዐለት (ሰኔት) ወለቼ እት ሕቅፍ ለእግልዬ ዓባ እቱ እግል ትዕቤ ትቀሰበት። ጀለ ጀላሉቱ ውዳይ ሞላይ!! አነ ይመ እብል ወህተ ይመ። እምዬመ ለምን ሕቅፍዬ ሰኒ ብርድት ለይዐለት እብ ቀልብ ናስሕ ለናይ ዋልዳይት ሕቅፍ አነኩ በናተ ወዕዛለ ኖስ እንዴ ኢኮን፡ እብ ኒበ ወክንፈረ ጸብጠተ። ሐዝለት ወእት ነሐረ ሐቅፈት፡ አትህመግት አተልሄት ወአተባቀረት። እምዬ ወለ ወለት ሕደጋት-እዴ ለሕቼ ምስል ሐዝለዩ ወይመ ትበሀለዩ። ሕቼ ውላድ ርሕመ፡ ወእምዬ ውላድ ውላደ፡ ሕቼ እት ዕምር ንእሽ ወእምዬ ዲብ ዕቢናህ።

ላመ “ኢጣሰስኩዉ ወልዬ ፍዳሁ ሊዴኒ ልትፈሌ!” እት ትብል ክምሰል ገሌ እንቅሰት ምንዬ ለህሌት ትትረኣየ ለዐለት ወልዳይቼ፡ አዜ ለሻመ እት ሰኔት ወለቼ ዜደ ወትወሰኩ። ሰኔትመ ክልኤ ዕንቱ እት ገጽ ዋልዳይቼ ሰበት ፈትሐተን ይመ እግል ቲበለ ሐር ሐር ኢትቤ ምኑ። እምዬ ክምሰል ውላድ ዕበ ሰበት ትርእየ ዐለት፡ ለምንዬ ነቅሰ እንዴ ትቤ ተሐሰቡ ለዐለት እብ ዐሰር ዕጹፍ እት ሰኔት ወለቼ ወሰኩ። ክሉም ሰነ ህዩ “እምኪ ኢኮን አቦዩ ቤለ” አክለ ቤለያሃተ ለአማን ህግያህም ክምሰልተ እንዴ ኢትሐብዕ ምነ ወኢትሰትር፡ እብ አሰፍ ወብዳይ “እምዬተ እንትም ሚ ከሴክም” እት ትብል ትብልስ



እቶም ዐለት። ሰኔት ማሸኣለ ዐቤት ወሰነት አዳመ ገብኣት አናመ ክምሰለ ኢየተመት መስለት እቼ። ሰበቡ እት ሕቅፍዬ ትሐቀፈት ወእት ነሐር እምዬ ለበኪት ትሐርገዐት። ደፍኦት ወረሐመት ዓማቱ ወለ ቅዝር ሻከቱ እምዬ እንዴ ገብኣት ሰበት ትትርኢኒ፡ ጸርዩ እት እንተ እግል እምዬ አዘምኮ ምኑ። ድራሰተ ሐቅ አትመመት ህታመ አሰክ መዲነት ሸባባት እግል ምግደስ ወዳይ ወጠን እግል አትመሞት እስኢነ ዋጨለት ሰኔት። ያረቢ እብ ሰላመተ ብለሰ እተ እቱ ዐቤት ሸፍር ወሕቅፍ ለናይ አማን አቦተ ወሐሬ መግብያይት እመ። እግል ትትሐንቀቅ ወእግለ ዓቤተ እም ምን ሀመት ወመሻቀለት እግል ትድሐን።

እሊ ሰድ እሊ ለእት ዕምር ዕብናህ ሐቅፈት እምዬ አክለ እቼ ደንገጸተ ድንጋጽ እግለ ደንገጸት እተ። አርድ ወሰመ ምን አሕድ መትፈራግ እግለ አበ። ትሰፍለለት፡ አተግደዐት፡ ትሻቀለት፡ ረቢ ውላድ ሃይበ እት እንቱ ሻማት ሰኔት እብ አምኣት ዕጹፋት ገርቦ ወረ። እብ ሸቀላት ወሀማት ሰነብ ላሊ ወአተቅሳይ አድሐ መልሂተ ገብአው። አናመ ምነ እግለ ወለድኮ ሰኔት ወለቼ መሻቀላቼ እብ ፈርህት እት እምዬ ዐለ። ላመ አነ እብላተ ይመ ልበ ከርዩ እግለ ይዐለ። ፊያተ ወቅት ለሰኔት ይመ ትብላተ ገናብተ ትትፈስስ ወደሚረ ልትረየሕ ዐለ።

ዋልዳይቼ አነ ወድ 12 ሰነት ዲብ አነ ዋጅብ ወጠን እግል አትምም አሰክ ሰውረት ክምሰል ጊሰኩ፡ ሐቅ ሕርየትመ ምን ገብእ እግል ወቅት ሐጨር ለትሰረረተ ምስለ ሰበት ይእነብር፡ ቶቤኮ ምነ አነ እግል እምዬ “ይመ” ዲብ እብል ለነቀምኩዎ ወክድ ዝያደት፡ ለሰኔት ወለቼ አቦተ ዲብ እንተ እብ “ይመ” ለትነቅመ ዘይድ። እብሊ ህዩ ሰኔት ወለቼ ዮም ናየ ወናዩ እንዴ ወዴት ቱ እግለ ርሐመት ወፈታይት ውላድ እምነ “ይመ” ዲብ ትብል አሰክ እለ ትትላከዩ ህሌት።

ዐጅብ!! አነ ወለቼ እምነ ሐቱ!!! ክልኦት ርሕም ወዎሮት ሕቅፍ። አናመ ወለቼ ምስልዬ እግል እምዬ ይመ እት ትብል እምኪ ኢኮን ረቢ እፍጉረ ምንዬ ኢኮን። ላኪን ለኢልአምረነ ምንዲ ሰመዐነ ወትፈከረ ዲብክ ገብኧ!!? አማንተ እምበል ሐሰት፡ ሕቅፍነ ዎሮት ወአሌለዮትነ ዎሮት። አነ ወድ ርሕመ ወሰኔት ወለት ወልደ ወድ ርሕመ።



መብን ውልደት ወአጃኒት ጌት ጌሰብዳልየት ከረን ትባን



እት ዐንሰበ እብ ተጠውር ሰልፋይት ጋብአት ለህሌት እስብዳልየት መርጃዕየት ከረን እግል እማት ወአጃኒት ለክድም፡ ሐዲስ መብን ሰበት ትባን እሉ፡ ወዘረት ዓፍየት አሚና ኑርሐሴን፡ ውብዕዳም ውቁላም ሰብ ሰልጠት ሕኩመት፡ ወእግል መናሰበት እግል ልነውሮ ለመጽአው ዕዙማም ጋሽ እተ ሐድወረ መናሰበት ዲብ ዮም ሐቲ ዲሰምበር 2022 ለመብን አድሐረት።

እለ መናሰበት ህዬ ረሀየት እግል መናሰበት ላተን እማት ወአጃኒትን ሰበት ተ፡ ፈርሐተ እት ክል ገጽ ናይላ ሓድራም ለዐለው ትረኤት። እስብዳልየት ከረን እት ሰነት 1936 ለትብኔት እት ገብሏ፡ ለትሀይቡ ከደማት ምን ወክድ እት ወክድ እት ዘይድ ልሄርር ሀላ። ቀደም እለ እት ለአብር ገይሰ ለዐለ መባኒህ፡ ዮመቲ ልትሐደሰ ትርእዩ። ቅስም ለልአትቃብሎ ሐማይም፡ ቅስም ለረግዶ፡ ቅስም ሕማማት ክርሱ፡ ዕያደት አጀኒት፡ ክድመት ዓፍየት አንያብ ወዕንታት፡ ላቦራቶሪ ወፋርማሲ ለመሰል ክዳማት እትለ እስብዳልየት ልትሀየብ።

ክም ናይ አቅሊም እስብዳልየት መርጃዕየት ህዬ፡ ምን ኩለም ምዴርያት ዐንሰበ እግል መጽአ መዋጥኒን ክድመት ተሀይብ። ለእስብዳልየት ህሌት ዲበ አካን፡ እት በርሽማይት ጽርግዩ ሰበት ህሌት፡ ምን ቅብለት በሐር ቀየሕ ባካት ነቅፈ፡ አፍቦበት፡ ቅርሪ፡ አደብሐ ወምድር ብዕድ፡ ክምሰልሁመ ምን አቅሊም ጋሽ-በርከ ድዋራት መንሱራ፡ ሰልዐ ወክርከበት ለመጽአ መዋጥኒን እግሎም ክድመት ተሀይብ። እተላላይ ናይላ ልትብኔ

ለጸንሐ መአሰሳት ዓፍየት ወአተዮት ዘበናይ አላት ሕክምኑ፡ እግል አጀኒት ወእማቲ ለትከድም እስብዳልየት ሐዲስ እንዴ ትብኔት ክድመት ተሀይብ ህሌት። እሊ እት ሄለል ዲሰምበር 2022፡ ለትደሐረ መብን፡ እግል ጸንሐ መሓግዝ እግል ለአርሄ ሰእየት ዐባይ ጋብአት እቲ ህሌት።

እስብዳልየት ቅስም ወሊድ ወዓፍየት አጀኒት እት ቅያሰ 2,700 ምትር መረበዕ ለትገብእ አካነት ብኒት ህሌት። ቅስም ወሊድ፡ ቅስም ዕላጅ አጀኒት፡ ቅስም ዐመልያት ወመታብዕት፡ ቅስም መራቀብት አክይ-ኖስ ለበን ዐመሲ፡ ለትፈናተ አቅላም ፈሐሴ፡ መሰከብ አግሩዝ ወእማቶም ለክምክም መብና ተ።

ናይ አቅሊም እስብዳልየት መርጃዕየት ከረን፡ ክል ሐል እብ ተቀደም 2,500 ዐመሲ ትትሐደር። ምናተ ምስል ሪም ወቅት፡ ወኢውጡይ መካሪት ምድር እት ሸቅል መጋዴዕ ክልቅ ክም ዐለ ልትአመር። እብ ናንቲት ቅስም ወሊድ ምን ቅስም ዐመልያት ወመሰከብ አጀኒት ረዩም ሰበት ዐለ፡ እማት ሐቆ ዐመልየት ወደየ ልግበእ አውመ ውልደተን፡ ኬን ወእንሰር እት ለአትቃብለ ለሓልፋሁ ለዐለየ ወቅት ብዙሕ ተ። ሰበት እሊ፡ አንጎጋይ፡ ሪም መሳፈት ወኢመትወጣይ ክልቁ ለዐለ መጋዴዕ፡ እት እማት ወአግሩዝ መሻክል ብዙሕ ሳድፍ ክም ዐለ ለረከብናህ ሐብሬ ተአክድ።

እሊ ህዬ፡ ቅብላት ሀደፍ ወናእየት ውሳሪት ዓፍየት፡ እት አንቀሶት ሞት እማት ወአግሩዝ እግል ኢልግበእ ለልአሰፍ ጋር እት እንቲ ጸንሐ።

ወዘረት ዓፍየት አሚና ኑርሐሴን ሪዖንለ መድሐራት እንዴ በትካት፡

እግል መናሰበት ፈረሕ ክም ከስተት፡ መዕየ ዓፍየት ናይላ እስብዳልየት ወጋሽ እንዴ ተለው፡ ወራት ሸቲል ዕጪይ ወዴት። እት ዘሪበትለ እስብዳል ዕጪይ ክም ሸትለት ህዬ፡ አስከ ዲብ ምግብለ ሐዲስ መብን ዱሉይ ለዐለ መከበት ጋሽ ሄረረት። ለበርናምጅ ህዬ እብ ዝክረት ሹሀደእ አንበተ።

እግል መናሰበት ለልአንምል ብለዕ ወስተይ እት ልትዳወር ህዬ፡ ሀንደሰት ወሽቃይለ መብን ለክስሰ



ዕሬ ሰወር ትረኡ።

“እለ እግል ዝያድ አርት ዑቁድ ለታኬናህ መናሰበት መድሐራት እስብዳልየት ወሊድ ወአግሩዝ፡ አሰናይ እብ ሰላም በጽሐናህ።” ለቤለ ሙዲር እስብዳልየት መርጃዕየት ከረን ዶክተር ያፌት ሀይሌሚካኤል፡ ናይ አቅሊም እስብዳልየት መርጃዕየት ከረን ዘበናይት ብንደት ትሕትየት እንዴ ኢትረክብ ለጸንሐት እስብዳልየት ሰበት ተ፡ እግል መዋጥኒን እተ ልትሀየብ ክዳማት ዓፍየት፡ ነቃሰ ብዝሕት ትሳድፍ ጸንሐት። ምናተ እለ ወሰክ እስብዳልየት እት ደማነት ዓፍየት እማት ወአግሩዝን ረሀየት ዐባይ ርክብት እበ ክም ህሌት ሸርሐ።

እለ ብናህ እብ ተማሙ እብ መቅደረት ሕኩመት ኤረትርየ ለትሸቀ እስብዳልየት፡ 90 ሚልዮን ነቅፈ ከለፈት። ለህለ ዲበ ህዬ፡ 33 ቅረፍ ረገድ፡ ምስል ታምም መቅየስ መንጠቀት ለቡ አላት ሕክምና፡ እብ ዐነድር አስክ ክል ቅስም (ዋርድ) ለልሄርር አክሲጅን፡ መልጽሓይ

አላት ሕክምና፡ ጣቀት ጸሓይ ወጀነሬተር፡ ደለ ተአትሐዜ ብንደት ትሕትየት ውጅድት እለ ህሌት።

ዶክተር ያፌት ለመብን ወርሕቡ እበ ከስስ እተ ቀደመዩ ተቅሪር፡ እት ፍንጌ ቅስም ወሊድ ወዐመልያት ለዐለት 210 ምትር ለትገብእ መሳፈት እት አርበዕ ምትር አጭብቦተ፡ ቅስም ወሊድ ወአግሩዝ ምን 165 ምትር ዲብ 20 ምትር፡ እት ፍንጌ ቅስም ዐመልያት ወመሰከብ አግሩዝ ለዐለት ናይ 350 ምትር መሳፈት፡ እት ዜሮ ምትር ቃርብ ክም ሀለ አፍሀመ።

እሊ ህዬ ሰርገል ዐቢ ሰበት ተ፡ እግል ኩሉ ሸብ አቅሊም ዐንሰበ ‘አሰናይክ’ ቤለ። ዶ/ር ያፌት ኩሎም እሊ ሸቅል እግል ልትነሰር ለክድመው ጀሃት እት ለሐምድ፡ እሊ መብን ተጠውሩ ወነዳፈቲ

ዓፍየት፡ ክምለ እት በዲሮም እግል ልዕቀብ ወልራዕወ ትፋኔቶም።

ሐዲስ እስብዳልየት ወሊድ ወአግሩዝ ከረን 22 ዐራት እት ቅስም አጀኒት፡ 14 ዐራት እት ቅስም ወሊድ፡ 18 ዐራት እት ቅስም ረገድ ሐቆ ዐመልያት፡ ወ14 ዐራት እት መሰከብ እማት ለትከምክም እት ገብሏ፡ እብ ዓመት 68 ዐራት ብዲቤ። እዳረት እስብዳልየት ከረን እት ሸቅየትለ መብን ሐዲስ፡ መትካዝም ሐዲስ እንዴ ወዴት፡ ላሊ ወአምዕል እት መታብዕተ ፍርት ህሌት። እለ ክድመተ ለአንበተት እስብዳልየት፡ ክድመት እግል መትካፍዐተ፡ እዳረት ነዳፈተ፡ ቲክኒሻናት ወዋርድየት ሻምለት ተ። ዕዱማም እብ ዶ/ር ያፌት ወዶ/ር ተክሌ እት ልትመርሐ፡ እግል መብን ወአላቲ ዐፈው።

ሰለመት ፈረጅ ለትትብህል እም ጅን፡ ናይ ሰማን ወሬሕ ግርዝ ለወልደት ተ። እት መብን ለሐዲስ 16 ምዕል ከልአት። ምን ሓለት ጅነተ ክም ትሰአልክው፡ “ማሸአለህ ሰኒ ወለድኩ፡ ወለቼመ መራዐየት ሰኔት ትረክብ ህሌት። እት ክእነ ትመሰል እስብዳልየት ምን ወለድኩ፡ ፋርሐት አነ” እት ትብል እግል ትሸርሐ ለኢትቀድር ተጠውር ርእየት ክም ህሌት ወደሐት እዩ። ፈርሐተ ህዬ እት ናይ ገጸ ሰሓቅ ትትቀረኡ። ሳብዕ ጅናህ እትለ እስብዳልየት ለትፈረጀት ህዬ ዓፊት እድረሰ ተ። ህታመ ተጠውርለ እስብዳልየት እቡ ክም ትሰአልክው፡ መጸጸት ውልደተ እብ ፈርሐተለ መድሐራት ክም ትረሰዐተ አክደት እዩ።

ክም መራቅባይት ሐራሳት ኬን ወእንሰር ትብል ለጸንሐተኒ ኔርስ ርግኣት ኪዳኒ፡ “ሸቅልኩም እትለ ዘበናይት እስብዳል ሚ መስል?” ክም እቤለ፡ “ክምለ ቀደም 13 ሰነት ዲብ እትወዘዕ ለዐለ እዩ አዋይን ሸቅል ዲቡ አቅበልኩ። እት ብዕድ አቅላም ትንፋሰ ምር ነፈር ተዐቅብ፡ አዜ ሳኪን አርወሐት ክልኦት ወምኖም ወለዐል ትራቅብ፡ ሰበት እሊ ለበዳሪት ለትትሐመድ ተ” ትብል።

ሕኩመት ኤረትርየ፡ ረኪብ ክድመት አኣፍየት ምን ሲያሰተ እንዴ ረስመት ምን ትበገሰት፡ እት ክል 10 ኪሎምትር ዕያደት እግል ተህሌ ትከድም ህሌት። መዋጥኒን ህዬ እት ቅርባም ክድመት ዓፍየት ወዕላጃት እንዴ ረክበው ምን አምራድ ነግፎ ወሳራም ገብእ ወረቡ ህለው። ሰበት እሊ አስሐባብ መአሰሳት ዓፍየት ሌጠ እንዴ ኢገብእ፡ መትነፈዕ ወፈሀም እት ክዳማት ዓፍየትመ እብ መጅቡ እት ወሰክ ልትረኤ ህላ።



2^ይ ክፈል

ዐብደላ መሐመድዐሊ (መዐልም)

ለሰፈር ዝያደት ለአገረመዳ፡ ለመካሪት ምድር ምስለ ድማን ወድገለብ ናይላ ጽርግዩ ለልትረኤ ንዋይ ወሐርስ ተ። ለዲብ አድብር ሽፋል ልትረኤ አንውየት፡ ምስለ ዲብ አግዳም ሐላይል ዝሩእ ለህለ ጀራዲን ወዲብ ክል አካን ልትበኔ ወልትዐመር ለህለ መዳይን ለፍሬ ሕርየት እብ ፍዕል ለዘቱ ተአዳውር። ከደን ለዐለ ምድር የም መዳይን ሐዲስ ልትበኔ እቱ ዲብ ህለ፡ ለግምሽ ጀረው ልብል ለዐለ ዘራታት ዲብ መዓል ጀራዲን ልውዕል ዲብ ህለ፡ ሸዐብ ምን መትሸርሻር ትርበት ምድር ካርር ወሳልል ዲብ ህለ፡ ደረሰ ከራሪም እንዴ ትሆገለው ሰርም አስክ መዳርሶም ለአሴሮ ወሰርም ክወር ልተልሀው ዲብ ህለው እማት ጀላብ ዓፍየት አጀንተን ወረሐን አስክለ እት ክል ቀርየት ለትበነ መአሰሳት ዓፍየት ለአውሀልየ ዲብ ህለየ፡ ዶል ትርኤ ለፍሬ ሕርየት ዝያደት በይን እግልኩ። ጀማል ወአልማዝ እሊታት ምን ቅሩብ እግል ልሻሁዱ ሰበት ቀድረው ህዩ እሊ ሰፈር እሊ ዝያደት ነፍሶም ለፈቱቱ ወለትረይሐው እግሉ ሰፈር ዐለ።

ጀማል እሊ ክሉ ምን ድግም ናይላ ምስሉ ለዐለው መልሂቱ ልፍህሙ ዐለ ዲኢኮን፡ እብ ዕንታቱ እግል ልርአየ ላተ ሰዱድ ዐለ። ሐቆ ተሕሪር መዲነት አፍዐበት እትሊ ባካት ልሰዔ ወለአሰምቤ ልርኤ ወለአነጽር ምንመ ዐለ፡ ሐቆ ሰነት ላኪን ዲብ ጀብህት ሐልሐል አመተ ኢተአመረት ዲብ ፈትሽ ለተምከዩ ለቀም ሰበት ትፈርገዐ እቱ ለክልኤ ግሩማት ዕንቱታቱ እተ ዶለን ፍዝ ሸዐብ ወወጠን ገብአየ። እሊ ባካት እሊ ህዩ ሐቆ 1988 አዜቱ ካይዱ ለህለ።

ፊልከት እንዴ ሐለፍከ ለትረክበ መዲነት ዐባይ አፍዐበት ተ። ጀማል እግል አፍዐበት ሰኔ ለአምራ፡ ንኡሽ ዲብ እንቱ አቡሁ ዲብ አፍዐበት ፖሊስ ሰበት ዐለ፡ ላመ ምንኣሹ ሕቱ ሰቲ ዲብ አፍዐበት ውልድት ሰበት ተ። ክምስልሁመ ዲብ መደት መደውሻሽ ናደው እዝ ጀማል አሰልፍ ለዲብ ድዋራት ፊልከት ሸሂድ ቃእድ ክፈል ዴሽ 85 ለዐለ ገርዝግሄር ውጩ ዲብ የም 17 ማርስ 1988 “የም እት ቀብር ናደው እዝ እግል ንሻርክ ዕዙማም ህሌን” ለቤለ እቱ እጅትማዕ ዴሽ ሐቆለ ሻረኩ እብ ጀህት ፊልከት ወናሮ እንዴ ሐልፈ እግለ እብ አድህረ ለአተየ ደባባት እት



ዲብ ማርስ 1988 ዲብ አፍዐበት ለትጸበጠው ውላድ ሩሰየ

ሰፈር ስርቤብ ወሰፈላል!

መሬት ዲብ ተሕሪር አፍዐበት ሹሩክ ሰበት ዐለ፡ ክሉ መጃለ ህጅክ ናይላ መዕረክት ለህ ዐለት። ጀማል እግለ ደባባት እት መሬት ህቱ ወመልሂቱ አፍዐበት ለአቱ ዲብ ህለው ዝያደት ርዮሕ ውበሱዋ ቱ ለዐለ። መደውሻሽ ናደው እዝ ወተሕሪር መዲነት አፍዐበት ዐለም ለሸህደት እቱ ስርጉል ሐርብ ቱ ለዐለ። ወድ ብሪማንያ ላቱ ሱሕፊ ባዚል ድቪንሰል “መጀብ ዴን ቤንፋን” እንዴ ቤለ ዋሰፋ ክምስል ዐለ ዲብ ለትፈናተ ወሳእል እዕላም ህዱግ ዐለ። የምክን እለ መዕረክት እለ እግል ጀማል ምን ሻረከ እተን ዐባዩ መዓርክ በህለት መደውሻሽ ናይላ ዲብ ቅብለት ሳሕል ሻፍፍ ለዐለ ውቃው እዝ ማርስ 1984፡ ተሕሪር መዲነት ባርንቶ ጁላይ 1985፡ አፍሽሎት ሳምናይ ወራር ውበዕድ ምን ዐባዩ መዓርክ ጀማል ለሻረከ እቱቱ።

ጀማል የም ሐቆ ሰላሰ ሰነት ለካይዱ ለዐለ ድዋራት እብ ዕንታቱ ምንመ ኢሻህደዩ ለዲቡ ሐልፈዩ ታሪክ ሰውረት ወዝክርያት ንዓል ወንእሽ ላተ ሰኔ ልትዘኩ። እሊ ዝክርያት እሊ እግል ለአትሐድሰ ወለአዳውርቱ ህዩ፡ ምን ነብር እተ ደውለት ሸዋደን ለአመመዩ ወለከጠጠዩ ወምን አሰመረ አስክ ነቅፈ ለትበገሰዩ ሰፈር ዝያደት ራሐት ደሚር እግል ልክለቅ እቱ እንዴ ቤላቱ።

ዲብ ክል ወደግ ወዕንክለት፡ ደብር ወመሓዝ ሳሕል እብ ደም ምሔርበት ለትወቀረ፡ ምን ግም ዲብ ግም ታሪክ እት ለሓኪ ለነብር፡ አሰር ንዓል ልሰዕ ባይን ወባርህ ዲብ እንቱ ህለ። ለምን ሐርመት መሰሐሊት ለለአነብት አሰር ንዓል ዝያደት ግዝግዝ ክምስል ሐለፍክ ዲብ ባካት ሐርም ፈለክ ቀጻይር ለለአነብት፡ ዲብ ሰነት 1979 ዲብ ባካት ቆጋይ ለገብእ ስርጉል ከሚን ወሐቆሁ ዲብ መደት መደውሻሽ ናደው እዝ ዴበ ባካት ለገብእ ታሪክ ወአስክ እለ ልትረኤ ለህለ ገደድል መካይን ወደባባት አባይ እግል ኖሱ እንዴ ኢትሰኣል ታሪክ ሳሕል ለለሓኪ ቱ። ሳሕል ህዩ ምድር ታሪክ ወምድር ምሔርበት ክምስልተ ሸክ ኢትወዴ።

አልዐሰር አፍዐበት ክምስል አቱክ ለልትካዩል እግልኩ፡ ለክምስል ዒማት ናደው እዝ ለዐለ መዓላክር አባይ ቱ። ለወክድ ለህይ ጀማል እት መሸንገለ እብ ጀህት ቅብለት ምፍጋር ጸሓይ እብ እምዐሚዴ ወአድህረ ለአተ ደባባት ሰውረት ዲብ መሬት ለመዲነት ክምስል ረኤ ለዲብ ዘመን ንእሹ ለለአምረ አፍዐበት እብ

መዓላክር አባይ እንዴ ትክለለት ዲብ ምሮ ዐቢ መዐስከር ብድልት ዲብ እንተ ትረኤቱ።

ጀማል እተ ወክድ ለህይ ግረ ሰለሰ ሰነት እንዴ አቅብለ፡ ለዲብ ሰነት 1985 ምን ባካት ፈሕ ቅብለት ሳሕል እንዴ ትበገሰት እብ ቅምቤት አፍዐበት ለሐልፈት ጀማል ለዐለ እተ ብርጌድ፡ እተ ወክድ ለህይ ጀማል ነፈር ሆንደሰት እት እንቱ ለባካት እብ ጽልመት ዲብ ልትቀራራዊቱ ለሐልፈዩ። ለወክድ ለህይ አፍዐበት እብ ቀሊል ለትቀረብ መዲነት ይዐለት። ዴሽ ደርግ ሌጠ እንዴ ኢጉብእ ሩሰዩን ሚክረትመ ዲብ አፍዐበት ባክ ደርግ ዐለው። ለክቡድ ወዘበናይ አሰለሐት ክምስል ከረ 130 ሚሊሚተር መዳፍዕ ወእብ እስታሊን አርጋን ለልትአመር ሰዋሪክ ለሞዋዕ ፈዋሊልመ ዲብ አፍዐበት ሰበት ዐለ፡ አፍዐበት እተ ወክድ ለህይ እብ ቀሎ-ቀሎ ለትቀረብ ትመስል ይዐለት። እሊ ክሉ ዝክርያት አፍዐበት ጀማል የም ሐቆ ሰላሰ ሰነት ምን ሕርየት ልዘኩ ዲብ ህለ፡ ለቱለል ለህይ ወእሊ የም አፍዐበት ለህሌት አዋይን ሕልም መስል እትኩ።

ሐቆ አፍዐበት ለህሌት አስክ ክብክብ ለተአደንን ሐርመት ዐሾርም



ዲብ ፈርወንተር ጀማል ሹሩክ እቱ ለዐለ ሸሂድ ውጩ ለወደዩ እጅትመዕ

እግል ንብጸሕ ላተ ጀማል ወለምን አሚሪክ እንዴ መጽአት ነቅፈ እግል እብጸሕ ብዩ እንዴ ትቤ ለነዌት አልማዝ አብረሀ፡ ሐርመት ዐሾርም እብ ዕንተ እግል ትርአየ ሰኔ ትረመጩት። ለዲብ መደት ኢዮቤል ተሕሪር አፍዐበት ዲብ ሐርመት ዐሾርም ለተክለ ትምሳል ዝያደት ሐብሬ ናይላ ማርስ 1988 ለገብእ ዐውቱታት ለለሓኪ ቱ። ለዲብ ክል ወደግ ወዲብ ሐንቱ ክል ዕጩት ሰርቱክ ለህለ መካይን ወደባባት አባይ ክምስል ረኤክ ህዩ እተ ወክድ ለህይ ዲብ ረኣሰ አባይ ለጀረ ደማር አክል አዩ ክቡድ ክምስል ዐለ ኤተክ ኢትወዴ። ለእት ፍንጌ ክብክብ ወዐሾርም እንዴ ገብእ እግለ አወላይት ትመርሕ ለዐለት መኪነት ለደውሸሽ ምናድል ህዩ ዝክር ዲመ ተአሰትህለ። ለየም አለቡ ደባባት ወመዳፍዕ እብ ሐዩቱ አፍዐበት ኣቱ ምን ገብእ፡ ተሕሪር አፍዐበት ሰኔ ወክብደ ዐለ።

ድዋራት ክብክብ ብዙሕ ታሪክ ወጀራይም እስትዕማር ለጀረ እቱቱ። ዐሾርም፡ እብ ሳትር ዋልያን ለልትአመር እት መደት ካልኣይ ሐርብ እዲን እብ እስምንቱ ለትሸቀ ድፍዓት፡ ዲብ ሰነት 1967 እብ ዴሽ ህይለስላሴ ለነደት ክብክብ፡ ክሉ ምን ታሪክ ለለሓኪ ቱ። ምን ሐርመት ዐሾርም አስክ ነቅፈ ለህሌት ገበይ ምን ቅብላት ትርእየ ዲብ ህሌኩ፡ ለአስክ ዐሰተር ለአንቀዕርር



አድብር ለልትሐለፍ ኢመስል እትኩ። አልማዝ እሊ ምን ረኤት ቱ፡ ዲብ ትትፈከር፡ “አዜ አስክ ነቅፈ እብ እሱው እግል ንሕለፍቱ?” ዲብ ትብል ትሰኣል ዲብ ህሌት አማናቱ። ለአድብር ክምስል ክሌብ ሸት ተሐልፎ ልብል ለህለ ዲብ መስል ለህይ ክምን ኬን ለህይ ዲብ ሕድ እንዴ ትዋሽለ ልትረኤ። ላኪን ገበይ ነቅፈ ክርዕት ኢኮን ውበትክት፡ ለእብ ምግብ እሊ አድብር እሊ ድማን ወድገለብ ዲብ ልትለዋሌ ለለሐልፍ መሓዘት ወአድግ ወእብ ፍንቱይ ለእብ ሕሊል ሕዳይ ልትአመር መሓዘ፡ ምስሉቱ ነቅፈ ለተአቱ። ለምን ዐሾርም አስክ ነቅፈ ለህለ ድዋራት ህዩ ለሕሹኩብ መካሪቱ። ለአስክ ሰመ ለለንቀዕርር

ጀህት ምፍጋር ጸሓይነ ለህለ አስክ ናሮ ለለአደን ስልሰለት አድብር ህዩ ሮረት ልትበህል፡ ዲብ ልብል ለሓኪኒ ዲብ ህለ፡ ጀማል ክልኤ ዕንቱ ምንመ ሐግለ፡ ለሓድር ደሚሩ ግረ ዲብ እብ ዕንታቱ ለዐለ እቱ ወክድ እንዴ በልሰዩ ለድዋራት ምስለ ሰብ ዕንታት ላቶም መታሊቱ ልትፈረጃ ክምስል ዐለ ሸክ ኢትወዴ።

ሰፈር ነቅፈ ሰኔ ነፍሰ ለትፈትዩ ሰፈር ሰዩሐት ዐለ። ለድማን ወድገለብ ዲብ መሸመዓት ለልትረኤ ፈሐም፡ ለዲብ አሰመረ እብ ሰማን ወሴዕ ርያል ለትዛበዩኡ ቤጭ፡ ዲብ እሊ ባካት እሊ ምን ክልኤ ርያል ለሐልፍ ይዐለ። ንዋይመ እተ ክምስልሁ፡ እብ 200 ወ300 ነቅፈ ወጃበት ጠሊት እንዴ ሐሬክ ትዛቤ። ለጋምል ዕጩይመ ሕርየቱ ለረክበ እት መስል የም ምን ቀደም 30 ሰነት ዲብ ሐንቱሁ ሕርጊግ ልብል ለዐለ ደባባት ወመዳፍዕ አባይ እንዴ ትሐረረ፡ ምድር ንዋይ ወተዋብ ክምቱ ለለአመርዴ ለዲብ ክል አካን ፍንጡር ለትርእዩ ከረርም አግለታት እግል ኖሱ ለድዋራት አርወሕ ክምስል በልሰ ትትየቀን።

ምድር ክምስል ዐወድወድ፡ ሐራሰ ሐርማዝ ወበያን እብ ስጋደት ስጋድ እንዴ አተንኩበነ አስክ ነቅፈ ዲብ እንፈግር እት ሰር ናይላ ገበይ እብ ስምጠ ግምቤት ለትትርኤ ደባበት እግል ኖሰ ታሪክ ንዓል እግል ተሓኪ ግሲት ለህሌት ትመስል። ለደባበት ለህ ዴበ እብ ፊራሮ በሕሪ ነጋሽ ለልትአመር ናይ ደንገበ 8ይ ወራር ደርግ ነቅፈ እግል ትጽበዋ ዲብ የም 10 አክቶብር 1985 እለ አካን እለ ክምስል በጽሐት ኤማን ወሰሙድ ነቅፈ ወውላደ ምን በጽሐተ አካን ክምስል ኢተሐልፍ ወደወ። ዴቡ እብ ቅምብለት ምሔርበት እንዴ ደውሸሸት ህዩ አስክ እለ ዴቡ ትነብር ህሌት። ለዲብ ግርበት ሰነት 1979 እብ ተበግሶ ለልትአመር ህጃም ዴሽ ጀብህት ሸዕብየት ሐቆ እንሰሓብ እስራተጂ ለዐበ ወለትሰርገለ ህጃምቱ ለዐለ። ምናድሊን እግለ ዲብ አፈት ነቅፈ ሻፍፍ ለዐለ ዴሽ አባይ በረጌዕ እንዴ ወደው አስክ ክብክብ አድኸዉ። እትሊ ህጃም እሊ አባይ ለሐድገዩ ወመምተለካትመ ሐድ ኢኮን። የም አለቡ ደባባት ወመካይን ዐስከሪ ህዩ ዲብ ሕሊል ሕዳይ ክምስል ክታር እንሰ ዲብ ልይትቃሴ ትሳለበ ወዝያደቱ ለገብእ ለደመረ እቱ ህጃም ምዳድ ቱ ለዐለ። እሊ ህዩ ምር ምን ብዙሕ ዲብ ሳሕል ወድዋራት ነቅፈ ለትረክበ ዐውቱታት ቱ።

ልተላሌ...

አብሳር ሳረዮት ግንፋኝ

ሓይላም ቂርአት፡ እት ናይ የም በርናምጅ ዓፍዮት እብ ክሰሱ ቀላል ለትመሰል ወላኪን እት ሽቅልን ፅዋል ወዲብ ዓፍዮትን መደረት ለትከልቅ ወተ'ረደት ምን ገብእ አሰክ ዐራት ክምሰል እንጸብዋ ለትወዲን ግንፈኝ፡ ወእለ እግል ንሳሬ እት ቤትን ለእንወድዩ አሰርየት ጉሉላት እግል ንህደግ ቱ። ምናተ እትለ አዜ ለህሌን እት መደት ገሸለት ኮሮ። ኮሮን ራክብኪ ሀላመ ምን ገብእ፡ ምን ግንፈኝ ለትፈንትዩ ሰበት አለቡ እት ቤትን ሰራይ ጉሉላት እግል ግንፈኝ እንዴ እንወዴ እት ብቐት እግል ኢንትከሬ፡ እሰልፍ ፍሕስ ኮሮን እንዴ ወዴን ሰላመትን እግል ነኣክድ ወጅብ እት እብል እት ጽበዋለ በርናምጅ ዐዲኩም።

- ሳልሕ መ/ሰዲ (ነግዳይ)
- ሰራይ ጉሉላት ግንፈኝ አው ዐቢስ
- ለበዝሐ ክፈል ምጅተመሶ፡ ግንፈኝ እት ትትዘከር እቱ ወቅት ክምሰል ቀላል ወሐቱ መደረት ለኢትወዳተ እንዴ ልብል ለአትቃልለ። ምናተ ግንፈኝ ቀላል ለትገብእ ኦሮት ነፈር ግንፈኝ
- ድግሪ ሰንትግሬድ ወለዐል)
- መጸጸት እዘን
 - ጠርሽ ወእብ ፍንቲት ሐቆ ሐርቅ ወሕርክራክ
 - መትሻምዖት ኣንፎታት ለሰበት ደየግ ትንፋሰ
 - መጸጸት ኣፍልብ ወለመሰሉ እግል ንሰሚ እንቀድር።
- ሰራይ ጉሉላት ግንፈኝ እግል ኣግሩዝ



እት ለሐምም እቱ ወቅት አሰባበ ወአሸይረ አገድ እንዴ ፈሀመ እግል ሊደየ ለወጅቡ ምስዳር ዶል ነሰእ ሌግቱ። ለትሰረረታ ግንፈኝ ክምሰል ለገብእ ሕማም ብዕድ ብቐት ዓፍዮት ወፅዋል እግል ተኣጅሬ ዲብኪ ሰበት ትቀድር፡ እንዴ አትቃልለክ ለትትረኡ ኢኮን። ህተ ህዬ እብ ሻይረሰ ለትመጽእ ወምን ነፈር እት ነፈር እብ ቀሊሉ ለትዐዴ፡ ሕማም ለዓልያይ ክፋል ሰርዐት አትንፈሶት ተ። ግንፈኝ ለበዝሐ ወቅት ምን 7-10 ምዕል ትከልእ ዲብኪ። አሸይር ግንፈኝ እት አግሩዝ ወዐቡ እንዴ ፈናቱን እግል ንርአዩ።

- አሸይር ግንፈኝ እት አግሩዝ
- ትሉሊት በህለት ለኢተኣትካርም ሰዕለት አው ሐርቅ
 - ሐዝ ውቁል(ምን 38



ሐፍነ ሞቃ ዲብ እንቱ እግል ነሀምቱ ብኒ። ኮካተላ ወለመሰሉ ካፊይን ለልትበህል ቀመም ለቡ ለልትሰቱ ሓጃት ህዩብ ሸን ማይ ሰበት ለአበዜሕ ወሸንህት ሰበት ደብእ እግል ነሀምቱ ኢወጅብ።

3. መዲደት፡ ግንፈኝ እግል ሐመ ነፈር ንኡሽ ልግበእ ወዐቢ መዲደት አስተዮት ምን ሰነዋት ቅዱም ንትነፈዕ እቡ ለዐልነ ወለህሌን ጅሩብ ሰራይ ግንፋ ቱ። መዲደት አው ሸርቤ ሕፉን ሰበትቱ፡ እግል ሹዋዕ ለዐለ ዐነድር አትንፈሶት ፈቱሕ። ሸንህትን ምን ነብረ ብዕደት ሰበት ትትደባእ እት ኣካን ነብረ ትነፈዕ ወሐሰት ወሐፋነት ተህይብኒ። ሰበት እሊ መዲደት እንዴ ይእንቀብባ እት ወክድ ግንፈኝ እብ ትሉሉይ እግል ትትነሰእ ለወጅብ ሰራይ ወክሳር ተ።

4. ፍሽፋሾ፡ ምን ማይ ለፈግር ሃፋ ወሐፋነት እግል እብ ሰበብ ግንፈኝ ሹዋዕ ለጸኔሕ ኣንፎታት ወዐነድር አትንፈሶት ክም ልትፋተሕ ወዴ። ሰበት እሊ እብ ግንፈኝ እግል ዱዩግ ለጸኔሕ ግርዝ ፍሽፋሾ ወዲ ለቀለ በሰር ሳረዮት ዲግ ትንፋሰ ቱ። ፍሽፋሾ እት እንወዴ እቱ ወቅት እሊ ለተሌ አሰሉብ እግል ንተ'ሌ ለአስትህለን።

- እት ግራብ አፋሁ ፋዬሕ ማይ አሰክ ፈሌሕ እንተኪ
 - ሐቆ ሰኒ ፈልሐ ምን ትኩይ እት ለህለ እሳት እንክርዩ
 - እግል ሕሙም ለህለ ግርዝ እብ ብላይ አው ሸፈት እንገልብበ። ምናተ አግሩዝ በይኖም እግል ልትፈሸፈሾ ሰበት ኢቀድሮ ዋልዴኖም ምስሎም እንዴ ትገልበበው እግል ልትፈሸፈሾ ወጅቦም።

- ለግርዝ ዕንታቱ እንዴ አቀመጫ እት ሃፋለ ማይ ለአድኖኔ።
 - እግል ሰር ደገገት ለገብእ እብ ኣንፎታቱ ክምሰል ልሰሕቡ እንወዴ
 - ለፍሽፋሾ እብ ቀጠፍ ቀላሚጦስ ምን ገብእ ሰኒቱ። ሰበቡ ህዬ ቀጠፍ ቀላሚጦስ እግል አራሽን ክምሰል ፈግር ሰበት ሰዴ።

- እሊ ሰራይ ጉሉላት እሊ፡ አሰክለ ግንፈኝ ተሐዬ እግል ልተላሌ ወጅብ። ምናታ ዋልዴን ለማይ ሕፉን እግል ግርዝ ገጹ እግል ኢልልህፍ ወኢለኣንድዱ እግል ልትደገጎ ሶም።
 - ለግርዝ ሐቀለ ፍሽፈሾ እግል ልትደብደብ ወልሰኩብ ወጅብ።
 - ለግርዝ ዕምሩ ምን 2 ሰነት ወተሐት ዶል ገብእ ላኪን፡ እግል ቤት ሌጠ ምን ነኣደፍእ ወነሓፍን እግሉ ልትሐሬ።

□ ሐሊብ ሞብ እም፡ ግንፈኝ እግል ሕሙም ለህለ ግርዝ እሙ ሞብ አበ እንዴ ትቤ እግል ተኣትሐድጉ ቱ አለበ። ህቱ እበ ግንፈኝ ኣንፎታቱ ዱቡእ ሰበት ጸኔሕ ሞብ ዶል ጸብዋ ለእበ ለአትንፍሰ ሰበት ለሐግል እብ አፋሁ እግል ለአትንፍሰ ለሞብ ጠልቁ። ሰበት እሊ እሙ እበ እት ለዐል ለዘክርናሁ አሰሉብ ወለመሰሉ ኣንፎታቱ ክምሰል ልትፋተሕ እግል ትውዴ ወእብ ትሉሉይ እግል አተሞብዩ ወጅብ። ሰበቡ ህዬ ሐሊብ ሞብ እም ለሐሰ ሰራይ ወክሳር ግርዝ ቱ።

ሰበት እሊ ዋልዴን እሊ ለእግሉ ዘክርን ሰራይ ጉሉላት እግሉ እብ ዋጅብ እንዴ ወዱ፡ እበ ሓለትለ ውላዶም ምስል ሐኪም እግል ልትፋህም ለአስትህሉም። ሰበቡ ህዬ ግንፋኝ፡ ደሐን ሀሌ፡ ሸር አለቡ እንዴ ልብሎ ህዩም እበ ለኢልፍሁሙ ተቃዩር እት ኒሞንዩ እግል ትትጠወር ሰበት ትቀድር ቱ። እሊ ለእት ቤት ወድወ ለጸንሐው አሰርየት ጉሉላት እግል ግንፈኝ እት ትትሸበህ ዶል



እግል አግሩዝ ለእንወድዩ ሰራይ ጉሉላት እግል ልትነፈጾ ቀድሮ። እት ረኣሱ ህዬ እሊ ለተሌ እግል አግሩዝ ለኢልትህዩብ ወህዩም እግል ልትነፍዖቡ ለወጅቦም ቱ።

እት ሐለቅም ወዐንቀር እንዴ ተኣከበ ዲግ ትንፋሰ እግል ወዴ ዲብኪ በላቅም አራሽን፡ ማይ ጩወት ገረረዕ እግል ኒበል እቱ ወንትባለሕ ምኑ እንቀድር።

ምስል ሐኪም እንዴ ትፋህምን እግል ግንፈኝ እንዴ ትበህለ ለዱሉይ ሸርቦታት ወለ ልትመልጠሕ ከናይን ወሕቡብ መጸጸት ረኣሰ ወሐዝ ንስኣትመ ኔፍዓይ ቱ።

Stop the spread of germs that make you and others sick!

Cover your Cough

Cover your mouth and nose with a tissue when you cough or sneeze

or cough or sneeze into your upper sleeve, not your hands

Put your used tissue in the waste basket.

You may be asked to put on a surgical mask to protect others.

Wash with soap and water

or clean with alcohol-based hand sanitizer.

Clean your Hands

after coughing or sneezing.

ኢትገይሱ፡ እግል ግርዝ አሰክ ዕደደት እግል ልንሰእዉ ላዝምቱ። እለ የም ግንፈኝ ትመሰለን ለትጸኔሕ ፈጅራት እት ለትኪለመት ደረጃት እግል ትትዐዴ ሰበት ትቀድር እንዴ ኢንትሃመል ወኢትህዩ፡ አጅኒትን ለወጅቦም መትደጋግ ወመራዐየት እግል ኒዴ እግሎም ወጅብ።

ግንፈኝ እት ዐቡዩ
ዐቡዩም ግንፈኝ እት ለሐሞ እቱ ወቅት፡ አክልሕድ ክምሰለ

ዶል-ዶል ምስል ግንፈኝ እንትሃባት ሸንበእ ወቀነቅሽ እግል ለህሌ ሰበት ቀድር፡ እብ ሐኪም ሐቆ ተኣከዳ ሰራይ እንትሃባት እግል ንንሰእ ለአስትህለን።

እምበል እሊመ ክመ ዲብ ለዐል ለእምቤሉ፡ እት ዘመን ኮሮን ሰበት ህሌን እሰልፍ ሰላመትን ምን ሕማም ኮሮን እግል ነኣክድ ለአስትህለን።




ዲ.ዛይን ፡ ታእዛዝ ኣብርካ

ሰወር፡ ኣክሊሉ ዘርእዝጊ

ሳልሕ ዓብደርቃድር

ርኢስ ጅምሁርየት ኬንዩ ዊልያም ሩቶ ሕብ ዐዙመት ርኢስ ኢሰያስ
ኣፍወርቂ እት ኤርትራየ ናይ 2 ኣምፅል ዝያረት ወደ



ሸባብ



ዶ/ር ዑመር ዑስማን

2ኛ ክፋል

እትሊ ናይ ዑፍሽ እግል አዝበዮት ለገብእ ደዓያት ብዙሕ አብሳር ህሉ። ብዕደት መሰል ዶል እንረኤ፡- ልባሰ አዋልድ አንሳት ለልክብዩ



ደዓያት ለወደዮ መአሰሳት፡ እግል ሐቲ ወለት ለልባሰ ላብሰት እት እንተ፡ በዐል ሻመ አው ብእሰ እት ለሐቅፈ ወእብ ልባሰ ርዮሕ እት እንቱ ለአርኤ። እሊ ህዩ ለአንሳት እሊ ልባሰ እሊ ዶል ልትዛበዩ ወለብሰ፡ ሰብአን ክም ልትረይሖ እግለን ለአሸር።

ለእግል ክም እሊ ደዓያት ለልትሐረዩ አዋልድ፡ እብ መባትክ ገርቦን ወግርመተን ለልትሐረዩ እት ገበኦ፡ እብ ሐሊት ካሚረት፡ ወአትጋራም ተክነሎጂ (አትሳናይ/ኤዲቲንግ)፡ ለእተ ደዓያት ህለ ልባሰ ሕናመ አክልሕድ ክምሰልህ እግል ለአምሰለናቱ ለልብል ፍክር ሰበት ለአሰብቅ እትነ፡ እሊ ልባሰ እሊ እት ሕርዩት ወመትዛባይ ንትፈረር። እሊ ሌጠ እንዴ ኢገብእ እብ ካሚራታት ወአትሳናይ እንዴ ገአ እቱ ለልትቀደም ደዓያት ለህለዩ አዋልድ፡ መቅዩስ ግርመት እንዴ ገአዩ ሰበት ልትሰመፀነ፡ ግርመትነ፡ ክልቀትነ መብባትክነ፡ ልባሰነ፡ ሓሊት መንበርነ ወብዕድ ነአትናእሽ ወነፍሰነ ነሐይ። ራሐት ደሚር እንሰእን፡ ሸረፍ ወእሕትራም እግል ነፍሰነ እንክልእ ወእት አክር ጨቅዋ እንጠውር። ለንተምነዩ ግርመት እግል ረኪብ ህዩ ምን ጀዲድ እተ አሳሰ ሕማምነ ሳቱ ደዓያት እብ ገዩሰ እቱ ለህለ ሓጃት እብ ወዲ እግል ንገርም እንጀርብ።

እት ደዓያት እብ ወለት ገበይ ምስለ ሐብሬ ለመጽእ ወእግለ ሐጃት ክም እንፈቱ ለወዱነ ሓጃት ብዝሓም ቶም። እግል መሰል አንድብእ እግል መዩጸት ወአንድፎት ለንትነፈዕ እቡ ዎሮ ምን ዐይነት ሐሪጭ አንድፎት አንድብ ኮልጌት ቱ። ለመአሰሰት እግል እሊ ኮልጌት ደዓያት እተ ትወዴ እቱ ወቅት፡ ለኮልጌት ልትነፈዕ ህለ ነፈር መባትኩ፡ ልባሰ፡ ለህለ እተ አካን ወብዕድ መረ ግሩም ክም ቱ፡ ወእት

ደዋይሖ አዳም ክም ለአሕተርሙ ለተርኤ ሱረት ቶም ለቀድሞ እትነ። አግዳ መባጽሖም ለኮልጌት ምንመ ገብእ ብዙሕ ሓጃት እብ ወሰኑት እግለ ዐፍሽ መረ ክም እንፈትዩ ወዱነ። እሊ ህዩ እብ ኮልጌት ሌጠ እንዴ ኢገብእ እብ

እተ ደዓያት ለርኤናሁ ሓጃትመ እግለ ኮልጌት ክም እንፈቱ ወዱነ። ሐ. ለኢልትሸኪ

ለእት ደዓያት ልትቀደም ሐብሬ፡ ክሉ ረአሱ እግል ንሚምዩ ወንማም ንውዴ እቱ ክም ይእንቀድር እንዴ ገብኦቱ ለልዳሌ። እግል መሰል እግል ሓመሎት ወአገረሞት ገናብትነ እንዴ ትበህለ ለልዳሌ መትጋረሚ፡ እት ገናብትነ ጸሌዕ ዶል ሰበብ፡ ለመአሰሰት እግል ንርኩብ ወንሸኪ ለህለ በክት



ዐቢ ቱ። እንዴ ተዐወትነ እተ መአሰሰት ዶል እንመጽእ፡ ሕነ እግል ልሳድፍ ለቀድር መሻክል እተ መጋረሚ ካትባም ዐልነ ሰበት ልብሎ፡ ቃትንመ ብዙሕ ለሰዴ እቱ መጃል ኢኮን።

እብ ዝዶድ ክልኦት ሰኒ ልባሰ ለለብሰው፡ ከምረት ለሰቱ አንፋር፡ ክልኤ ቅርረት ከምረት ክም ሰተው ክም ሰፊረት እት ነፍሮ ወዶል ደግሞ በለፎን እንዴ ከፍተው እት ሰመ እት ለዐርጎ ልትረከው። እግል ትሰኣል ጀረብክ ምን ገብእ ህዩ፡ ሕነ ክልኦት ግሩማም ከምረት እት ሰቱ፡ በለፎን ከፍቶ ወሰመ ለዐርጎ አርኤነ፡ ሚ ትብሉነ ህሌክም ቱ ለልብሎክም። ምን እት ሰመ ንጠሮ ቤሌክም እት ልብሎ እት ለተአሰሕቅ ወኢትትክለሰ መክሐደ ከሩኩ።

ደዓያት ከለዋ ኢኮን፡ ምን አማን ለሬመ ጽብጦም ቱ ለምሽክለት

ደዓያት (አድሸርታይዝመንት) ወተአሲሩ

ክመ እትለ ሐልፈ ክቱብ ለሬኤናሁ፡ ደዓያት ውድዮት ወዐፍሸክ ምስል ምጅተመዕ አትአመሮት ከለዋ ኢኮን። ክእኒ እብ ግብኦቱ እግልሚ ክም ከለዋ ልትረኤ፡ ወእት መሻክዩት ልትበጸሕ። ሰኣላት ብዙሕሕ ቱ ለልትቀደም። እብ አማን ህዩ ደዓያት ምህም ክፋል ናይ ተጃረት ወእንዳሰትሪ ቱ። ለለኣፈሩ ወለኣዘቡ ዐፍሾም ምስል ሽዑብ እግል አትአመሮት መሻቀዩታት እዕላም መትነፈሶት ዋጅቦም ቱ። እብለ ጅሀት እለ ዶል እንርእዩ፡ ደዓያት እግል ዐቡት ሱግ ወዐፍሽ ምህም ቱ። ልግበእ ደኣም ተጠውር ዕሉም ወተክነሎጂ እብ መትነፈሶት ለልዳሌ ደዓያት (አድሸርታይዝመንት) ምን ገበይክ ለጸዌ ወሽዑብ ሐሸሾት ክም ለመድ ለወዴ ቱ። ክእኒ እብ ግብኦቱ እግል ብዝሓም ባሕሲን፡ ቀዋኒን ለለፈግሮ ወትጃር እት በኣሰ ካሪ ልትረከብ።

ደዓያት እብ ፍንቱይ ለእብ ተለፍዝዮን ልትቀደም፡ አወላይ መባጽሖ ግብዮት ዕዳጋ ቱ። እሊ እግል ውድዮት ህዩ፡ አግቡይ መንበሮ ለቀደር፡ ወአፍካር ምጅተመዕ ለለኣሸክፍ ገብእ እብ ሀለዮቱ፡ እሊ ለዕዳግ እግል አፍይሖት ለገብእ መሰሰዒት፡ እብ ዐውል ገቢል ሰበት ገብኦ፡ ምስል ሕኩማት ልትበኣሰ፡ ምን መሳልሖ ህዩ መደረቱ ክም በዜሕ ልትሸረሕ ህለ።

እግል መሰል እግል አጀኒት እንዴ ትበህለ ለልዳሌ ደዓያት፡ ለአጀኒት እብ ከኣፎ እሉ እንዴ ረኣው እግል ዋልዴኖም ትዛበው እነ እግል ሊቦሎም ቀድሮ፡ ለከሰሰ ሕፍዝ እንዴ ወደው ሐቀሁቱ ለቀዱሙ። ክእኒ እብ ግብኦቱ ለእኪት ወሰኔት ኢለኣምር ጅኑ ምስለ እግል እብ ረሕመት ወፈተ ለለዓብወ ዋልዴት ልግበኦ መብዕዳም ለአትብእሱ።

እት አውሰትራልዩ ለገአ ሕፍዝ ክመ ለአሸሩ፡ አጀኒት ንእሹ ብዙሕ ወቅት ደዓያት ልርኡ ገኣው ምን ገብእ፡ ሸፍግ በሊሰ እግል ለሀቦ ቶም ለጀርባ። ለሻሸት ተለፍዝዮም ህዩ እግል ትብለሰ እቶም ሰበት ኢትቀድር፡ ምስል ወቅት እት መሸጎ ወሬክዐት ገበኦ ገይሶ። እት ዐበዩመ ለተእሲር ናይ ደዓያት ቀለል ኢኮን። እብ ትሉሉይ ለእንርእዮም ደዓያት



ምስል ወቅት እት ረኣሰነ ዳይመት ሱረት ለሐድጎ። እግል እለ ሱረት ንወርኬ ለህለ በክት ህዩ ሐድ ቱ። ክእኒ እብ ግብኦቶም ምስል ወቅት ረኣሰነ መክዘን ለኢለኣትሐዙነ ወኢነፈሶ ሓጃት እንዴ ገአ ተርፍ።

ዎሮ ማንደር ለልትበህል ባሕሰ ዕሉም እቅትሳድ “ፕራይቨታይዜሽን ኦፍ ኮንሾሰሽን” እት ሐንቲለ ልብል አርእሰ ለቀደመዩ ክቱብ “መባጼሕ ሰብ ደዓያት እግል እድንዩ እብ ሐቲ ዕን ክም ትትረኤ እግል ውድዮት ቱ” ልብል። እድንዩ ኣብ ዕን ሐሸሾት ወበዘርት ሌጠ እግል ትትረኤ ቶም ለለሐዙ። እሊ እግል ወዲ ሽዑብ ክለ እድንዩ አፍካሩ እግል ልትቀየር ብእቱ ባህለት ቱ። መባጽሖም እግል ልብጸሖ ህዩ፡ ደዓያቶም እብ ልብ አዳም ለሰልብ ወለኣከልዋ በርናምጃት ቶም ለመልእው። እብሊ ሓራይ ሰብብ ቱ ህዩ ደዓያት ዐፍሽ እግል አዝበዮት ክም ጀሪመት ልትረኤ ለህለ።

ናይ እሊ ዘመን ደዓያት ዓፍሽ እግል አዝበዮት፡ ሕብር ሓጃት፡ ወቅት ወክርን ኣንዴ አትሳነው፡ አትራዛቅ ለብእቱ ሓጃት ክም ነኣምን ወዱነ ለህለው። ምን እሊ ለለኣኪ ህዩ ዴራይ ተእሲር ለብኡቶም አወል ፈቲ ክም ሰጃረት፡ ከምረት ወሰዕለገት ክም ደሐን ወአዳም እግል ልውደዮም ክም ቀደር እብ ገበይ አፍላም ወብዕድ ለሓልፎ። እሊቱ ህዩ ምስል ጋባይል እድንዩ እት በኣሰ ለኣትዮም ለህለ።

ናይ እሊ ዘመን ደዓያት አህምዮት እግለ ሶም ሓጃት እግል አትአመሮት ወመትዛባይ እንዴ ኢገብእ ምጅተመዕ እድንዩ ሐሻሽ

ወምቤዝረት እግል ንግባእ ቶም ለዳርኩነ። ሓጃት እት ደዓያት እብ መስለሕቶም እንዴ ኢገብእ፡ እብ ሞዴሎም(ለትሸቀው እተ ሰነት) ወብዕድ ቶም ሐብሬ ለለሓልፎ። ለዐለት እግልክ እሰእን፡ ጅንሱ መንኪነት፡ መላጸዩ ሸከም፡ ኮልጌት ወብዕድ፡ ሸቅለ ሰበት አትመመት እንዴ ኢገብእ ሞዴለ ሰበት ሐልፈ ብዕደት ሐዳሰ እግል ትዛቤ ክም ብክ ቶም ለለሐብሮ። ክል ፈጅር ናይ እለ ሰነት እለ ሞዴል ማጽኦ ሰበት ህለ እሉ ትዛቤ ቶም ለልብሉነ። እሊ ህዩ ሐሸሾት ወበዘርት ዐባዮት እምበል፡ ዐፍሸክ እግል አትአማር ለገብእ ደዓያት ኣግል ልትበሃል ኢልትቀደር።

ሚ እግል ንውዴ ወጅብ
ቂድረት አምር ምክ ክመ ሸርሐው፡ ምን እት ወሰእል እዕላም ለገብእ ተአሲር ደዓያት እግል ንድሐን ለህለ በክት ሐድ ቱ ልብሎ። “መንዳር” ክመ እት ለዐል ለሸረሕናሁ “ቅድረትኩ አምርክ ወፈህምክ ምን ተእሲር ደዓያት እግል ለአድሕክ ኢቀድር” ልብል። ለሐሰ ሕጌ ድድ ደዓያት ክሉ ረኣሱ ኢርእዩቱ ወኢስምዐቱ ተ ልብል። ምን ተእሲሩ እግል ንድሐን ህዩ ጅሀድ ለአትሐዜነ። ሓጃት ልግበእ መክድመት እግል ንትዛቤ እተ ነሐዜ እቱ ወቅት ህዩ “ እሎም ሓጃት እሎም ኣት ሐዶትነ እክለይ እት ሐዝዮት ብእቶም?” እት እንብል ወነፍሰነ ንሰኣል እግል ንትዛቤ ወጅብ።

እብ ፍንቱይ እግል አትጋራም ለልትሸቀው ሓጃት ዝደድ መትሓፋዝ እግል ንውዴ ወእብ አትሐዝዮቶም እት ሐዶትነ ንትዛብዮም ወትሩድ መደጋግ ንውዴ ለአስትህል።



ልባብ

ዎሮ ሰኒ መትሃግያይ ላቱ ነፈር እግለ ነድወት እግል ሊዴ አሎም ጁምዓም ለዐለው ሐድ ክልኤ ምእት ለገብኦ አንፋር እንዴ አቅመተ፡ እግለ ሂጋሁ እብ ክምእነ አንበተዮ፣ እት ሰልፍ ናይ ዕስራ ርያል ናተት ለዐል እንዴ ጽብጠዩ እለ አርአዮም፡ ወሐር ትሰእለዮም፣ “እለ 20 ርያል እግል ልንሰኣ ለልትሸነህ ምን ሀለ?” ቤለዮም። እተ ቃዐት ለዐለ አዳም ክሉ እዴሁ ለይሀረሰ ይዐለ ዲቦም። አዜመ ምን ሐዲስ አቅመተዮም ወሐር፣ “እለን 20 ርያል እግል ዎሮትኩም እግል ሀበን ቱ፡ ምናተ እት ሰልፍ ሐቱ ወቅት በክት ሀበኒ” እንዴ ቤለዮም፡ እግለ ዕስረ ርያል ከመትት እት ሕድ እት ወድዮ አንበተ።

ሐቀ እላመ ትሰአለዮም፣ “አሰክ እለ እግለ ዕስረ ርያል ለልትሸነህ ምን ሀለ?” ቤለዮም። አዜማዲ ለእደይ አሰክ እለ እት ሰመ ለሀንጠዋጥለ ዐለዮ።

“ሰኒ ሰኔት” ቤለዮም። ከክምእነ ምን እንወድዮ ህዬ ሚ መሰለኩም?” ወእተ ምድር እንዴ ለክፈዮ እበ ጀዝመቱ እተ በላዋ ከዩይድ እት ወደዮ አንበተ።

ሐቀ እላመ ሀረሰዮ፡ አዜ ለአግሩሽ ዲብ ሕድ ከመትት ገብኦት ወእብ ርስሐት ገጸ በርሰተ ማሰለት ዐለት። “አዜ ህዬ ምን ቱ ለለሐዝዩ?” ቤለዮም። አዜመ ለእደይ አሰክ ሰመ ሌጠ ያለ።

ከእለ ክም ረኣ፣ “ጸርነ፡ እንቱም ግድም ክልኩም እብ ሕበር ዎሮት ሰኒ ቃሊ ላቱ ደርሰ ክቡታም ህሌኩም። እሊ ክሉ እተ ረአሰለ አግሩይሽ ለአጅሬክዉ ምሽክለትመ ማሰል እትኩም ይሀሉ፡ ወአሰክ እለ ተሐዝወ ህሌኩም፡ ምስምሳሁ ህዬ፡ ቂመትለ አግሩሽ ሐበት ሰበት ይኣንቀሰት ቱ፡ ሰኔት ዲብ እንተ ዕስረ ርያል ዐለት፡ አዜመ ገጸ ግራሀ ዋድሀ ዲብ ኣነ ለዐውለ አሰክ እለ ዕስረ ርያል ሌጠ ህሌት ናቅሶት ምነ ህሌትመ አለበ። ዲብ እለ እዲናነ ብዙሕ ዶል፡ እንወድቅ፡ ንትጀግለብ፡ ወተማም እት ምድር ንትረብረብ፡ ወእበ ኖስነ ለነሰእናሁ ቀራር ልግበእ መድዋራትነ ለሐክመዮ እትነ ትግበእ፡ እት ርስሐት ነንገርግር ወብዙሕ ንትጀግለብ።

እተ ዶል ለሀ ሕነ ርሕነ ሐቱመ ተርጀመት ለአለበ ትመል እትነ። ምናተ ለኣሰለት ለህሌት ወሐቀ እለ ለተሐሰል ምሽክለት ኢኮን፡ ለአአግደ ጋሪት እንተ ክሉ ረአሰክ ለዐውልክ እግል ተኣብድዩ አለብኹ። እንተ ፍንቱይ እንተ - ወእለ ህዬ ክሉ ረአሰክ እግል ትረሰዐ ለአለብከ አማን ተ!

ተበሰም

ዎሮት ሰኒ ታጅር ላቱ ነፈር መሓሚሁ እግል ልቃብል ሰበት ሐዘ እተ መክተቡ እንዴ ጌሰዩ እተ ቀደሚሁ ትገሰ።

ለመሓሚሁ ህዬ ገሌ ጋሪት እበ እግል ልትሰኣሉ ማጽእ ክም ሀለ ኢቀው፡ ምናተ እንዴ በድረዩ፣ “እት ሰልፍ ለእኩይ ከበር ነሀበክ መለአፍርህ ከበር” ቤለዩ።

ህቱ ህዬ፣ “ደሐን እት ሰልፍ ለእኩይ ከበር አሰኣኒ” ቤለዩ።

ለመሓሚ፣ “እሲትከ ሐቱ ሰር ሚልዮን ርያል ለትገብእ ሱረት ራክበት ህሌት” ቤለዩ።

ለእናስ ህዬ ሸክ ዋዲ እት እንቱ፣ “እሊ ለእኩይ ከበርቱ?” እት ልብል ትሰኣለዩ። “ለለኣፈርህ ከበር አሰክ ተኣሰእሲኒ ላተ እግል እትጸበረከ ይእቀድር” ቤለዩ።

ለመሓሚ ህዬ፣ “እብ ክሱሰከ ወእብ ክሱሰለ መሰንዩትከ (ፈታይትከ) ቱ” ቤለዩ።

ፍንቲት ረድ ፍዕክ ወበኪስ

ሐቱ እሲት አመተ ለይዐለት እለ እንጽራር ለምነ መጸት እንዴ ኢትትአመር ፍር ትቤ ወዲበ ትከሬት። እትሊ ለኬደቱ መካይድ ዶል ትርኤ ብዙሕ ለኣትፈክር ወለኣትዐጅብ ዐለ። ምን ክትርለ ፈርህት መውዲት ወዴት ወትጣርሐት። ምን ክትር ፈርህት ለገጸ ድምዕት ለህሌት መሰለት ወለክርንተ አርዐዴት፡ ወእበ ክልኤ እዴሀ ሀራብጠት ወምነ እንጭራር እግል ትትባለሕ ጃረበት። ለመዋዲተ ዐደዩ ዐለት እሉ። ክሎም እተ ባከ ለዐለውመ ብዙሕ በሀረረው ወፈጀዐው ወሚ ትጀሬ እቶም ክም ህሌት ሐቱመ ቀውደ። ለእሲት እት ደንጎበ እግለ እንጽራር እት ሐቱ እተ ባከ ለዐለት እሲት ብዕደት እግል ትንደፈ ምነ ቀረረት። አዜ ግድም እለ እሲት እላመ እግለ ተምሲልዩት እግል ተኣተላልዩ ህታመ ተረተ ባጽሐተ ሌጠ ህሌት። ለመባሸር ህዬ እግል ለአድሕን እብ ሰዐይ ሻፍግ እት እንቱ እተ ረእሰን በዋረ። ለአዳም ክሉ እብ ተር-ተረቱ እግለ እንጽራር እት ሕድ እት ናድፈ ምኑ ኣተላለ ወእት ደንኮብ ለእንጽራር እብላህ እተ መባሸር ትከሬት። ለመባሸር ሳብት ወሃድእ እት እንቱ በዋረ እሉ፡ ወእብ ሐጠር ዛይድ እግለ እንጽራር ለኣተ ቀሚሱ ክሪት ዐለት፡ እግለ ጠቢዐተ ሚ ክም ትመሰል ኣክል ሕድ ኣትቃመተዩ። ወዶል ለኣክል ሕድ ደማነት እት ነፍሱ ሰኣተ እበ ጭብዕቱ አንፈጠዩ ወምነ ገርቡ ሸንክዩ። ለቡንዬ እት እትባሸር እግል እሊ ሰኒ ለበሴጢኒ ጋር ኣተቃብሉ ዐልኮ። እተ ዶል ለሀ ለናይ ሐንገልዩ አንቱነ ገሌ ሕሳባት እንዴ ሀረሰ ብዙሕ ተዐጀበ ወትፈክረ፡ ከእለ እንጽራር እሊ ክሉ ናይ ተምሲል ለመሰል ጠባዬዕ መሰኡለት ምኑተ ገብእ? እቤ። ከክምሰልሁ ሐቀ ገብእ ለመባሸር ህዬ እብ ሚቱ ለኢትረበሸ? ለጋሪት እብ ምልሃሁ ወሰኒ ራውግ እት እንቱ ትቃርሐዩ ማሚ? ወክሉ ረእሱ ሓራም እቱተ ኢትረበሻመ። ለምሽክለት ዲብለ እንጽራር ኢኮን ለዐለት፡ ለምሽክለት ክለ ሒለት ናይለ አንሰ ቅብላትለ እብ ሰቡብለ እንጽራር ለሰድፈተን ረብሸት ተ ለዐለት። ከእሊ እት ርሕዬ እንዴ ዐቅበልኮ ዶል ኣሰተንተንክዉመ፡ ኣክል ሕድ እግል ልውደሕ እግልዬ ቀድረ። አቡዬ ልግበእ መለረኢሰዬ ጨጭ ዶል ልብሎ ዲብዬ፡ እለ ጨጮም ኢኮን ለረብሸት ትገብእ እትዬ ዐለት፡ ረብሸት ትገብእ እትዬ ለዐለት፡ እግልዬ ፈርህት ወረብሸት ወዴ እትዬ ለዐሉ ቅብላት እሊ ናዮም ጨጭ ለዐለት እግልዬ ሒለት ሌጠ ተ።

እት ሻሬዕመ ለናይ ሐረከት ፍጀዕ ኢኮን ረብሸት ለወዴ እትዬ፡ እሊ ብዝሐለ ሐረከትለ ዐረባት ለወድዩ እትዬ ፍጀዕ ለለሀርሰ እትዬ ረብሸት ወእት ቅብላተ ከዋወት እግል እንሰኣ ለህሌት እግልዬ ሒለት ተ ለትረብሸኒ ዐለት። ከምነ ትዋጅሀኒ ምሽክለት ወለዐል፡ እት ቅብላት እለ ምሽክለት እለ ለአርእዩ ረድ ፍዕል ህቱ ዝያደት

መደረት ለአጀሬ እትዬ ዐለ።

ከምን እለ ቅሶት እለ ለእንደርሱ ጋር ሀለ ምን ገብእ፡ እሊ ተሌ እግል ልትፈሀም ቀድር። ሐነ ክል ዶል ዲብ እለ እዲነ ረድ ፍዕል እንወዴ እንዲኢኮን በሊስ ኢነሀይብ። ከዲብ እለ ድግም ዶል ነኣቀብል፡ ለኣንሰ ረድ ፍዕል ቱ ለእሉ ወድዮ ዐለዮ፡ ምናተ ለመባሸር ላተ በሊስ ቱ

ለእሉ ሀበ። ከረድ ፍዕል ክል ዶል ምነ ጠቢዐት እብ ኖሱ ልትበገስ እት ሀሉ፡ በሊስ ህዬ ምን ሕሳብ ወፈዋን ቱ ለልትበገሰ። ከክል ዶል ለዋጅሁነ ጋራት ሕኔት እብ ደርኬ ጠቢዐት እንጋብሆም፡ እንዴ ሩግነ ወተማም እንደ ሐሰብነ ወፈጠነ እግል ንጋብሆም ለኣትሐዜ።

በሀል እ'መራም

ጆን ሲታይንዝክ (ወድ አምሪካ ላቱ ኬትባይ ቱ) ከእሊ ተሌ ገሌ ምን መባልሱ ቱ።

- ርሕዬ ኣላት ተሰዊት ተኣቤ እትዬ፡ ህተን ምንዬ ወለዐል ምን ክሎም ለጋራት ኣኪደት በን።
- እሰፍት ወኣዝነት ላተ ነፍሱ፡ እግል ወድ ኣደሚ ምን ጀርሱመት ወለዐል እት ሻፍገት እግል ትቅተሉ ትቀድር።
- ለበዝሐዩት መጋዕዝ ሐቀ ተመያመ እግል ወቅት ረዩም እግል ልጽነሐ ቀድረ።
- ዘመን ዎሮት ለሸንህት ኣለቡ መትዐግባይ ቱ።
- እት ገበይ ሞት ለልኣሴርር ሽዑብ እግል ሓድረት ለኣስተሕምል፡ ወኣሪት ለኣቤ፡ ወእበ ክሉ ረእሱ ኣክል ሕድ እግል ልፍቀዱ ለኢቀድር ክብር ወሕሸመት ቀዳሚት እት ልትመተዕ ልትረኤ።
- ዎሮት ኬትባይ ለእቱ ፍሩር ሀለ ወቀይ አግደ ምህም ላቱ ጋር እትለ እዲነ ክም ቱ እግል ልእመን ለኣትሐዜ፡ ወእሊ ወሀም እሊ ወለ እተ ቀልጣን ክም ሀለ ለልትኣክድ እቱ ወቅትመ ልግበእ ሰኒ እግል ለሐዋጡ ብእቱ።
- ላሊ ሐል ሰእነት እት እንተን ምዬያት ለዐለዩ መሻክል፡ ለጅነትለ ሰኑብ ክም ተዓመለት ምስለን ዶል ለምድር ለኣጸቤሐ ተ ሐል እት ረክበ ለረኤክወን እቱ አውቃት ሰኒ ብዙሕ ቱ።
- ወቅትነ ክሉ እት ሓዜ ደሐን ነኣልፉ፡ ወሐር ክም ረከብናህ ህዬ ነኣብዩ።
- ኬትባይ ዶል ለእብ በደን ልሸዕርተ፡ ክሉ ረእሱ እግል ልትሸርሐ ለኢቀድሮ ጋራት እግል ልሸረሕ ጀራርብ።
- ፈተ እብ እብ ፈተ ምን ኢገብእ እብ ብዕደት እግል ትትዛበዩ ለኢትቀድር ትመሰል እትዬ።
- ሕሩብ ሐብሬ ናይለ ወድ ኣደሚ ክም ሔዋን እግል ልፈክር እትለ ወደዩ ጀርቤ ለረክበዩ ፈሸል ተ።
- ኣፍካር ክምሰል መናትሌቶም፡ ክልኤ ዐለዩ እግልክ ምን ገብእ ወክፎ ክም ትትዓመል ምስለን ዶል ተኣምር እት ሐጪር ወቅት ደሰተት (ደርዘን) እግል ተሀሌ እግልካ ቱ።
- እብ ክሱሰ ብዕዳም ብዝሕት ለልኣምር የሀሉ፡ ከለሐሰት እግል ሊደዩ ልብእቱ ህቶም ክምሰልሁ ክም ቶም እግል ልርአዮም ብእቱ።
- ነሲሐት ለልሐዜ ዎሮትመ የሀሉ፡ ህቶም እት መጦሮም ለበዋር ሌጠ ለሐዙ ሀለው።

ጠዓዋ

ለእለ ትፈቱ ውዴ

እት ፍንጌ እዲነ እግል ትብኔ ወመዲሸት እግል ትብኔ ለሀለ ለትወድዩ መጻግም ለሀለ ፈርግ ሰኒ ዐቢቱ። ከእንተ አዜ ዲብ እለ ለኣተ ህሌክ ዶለቲት አዩ ምናምቱ ለእሉ ትወዴ ህሌከ? ገሌ አንፋር ክለ ሐያቶም እብለ እለ ቦም ሒለት እት የም ለኣለቡ ማል እግል ለኣክቦ ለዐል ወተሐት እት ልብሎ ለኣሉፈ። እሊ ህዬ እግለ እብ አማን እግለ ሐር ለሐዝወ ለሀለው እግል ልብጾሐ ኣርድየት ከልቅ እሎም። ዕምርከ እብ ሐዱ አሰክ ወድ 65 ሰነት ኢበጸሕከ ዕርፍ ወረዋግ ተርጀመት ወጠምጠም ልሰእን እትኩ። ከእለ ምን ገብእ እግል ተዓርፍ ወእግለ እለ ትትሸነህ እግል ቲዴ ብዲብኩ፡ እሊ ህዬ እንተ ቀደም እለ ለኣሳሲያም ላቶም ጋራት እት እዴክ ጽብጦም ዶል ህሌካ ቱ።

ሕነ እለ እዲነ ሐቱ ዶል ሌጠ ቱ ለእነብረ። ከእለ ሐቀ ትገብእ ኣፎ እትለ ረህየት ወራሐት እግል ለአምጾኦ እግልክ ለቀድሮ መጻግም እቶም ኢተኣልፈ? ምን እሊ ወኬን ብዕድ ጋራት እግል ቲዴ ዶል ተሐዜ፡ እሊ እት ኣሰፍ ለከሬ ጋር ቱ ወካሰተን ህዬ እብ ክሱሰ እሊ ኣዜታይ ሌጠ ትቀርኡ ዶል ህሌኹ። ኣሰርለ እለ ራክብ ህሌክ ንዕመት ሌጠ ግበእ፡ ወእተ ዶል ለሀ ኣልፍ ዕጹፍ ናይለ እት ራሐት እንዴ አማደድክ እብ ከሬርከ እት እንተ ለትሸዕር እበ ለውቀት ወለዐል እግል ትትለወቅ ቱ፡ ወሸበትከ 40 ሰዮታት እግል ትትወሰክ ቱ። ምናተ እት ሰልፍ እንተ እሱዋተ ለእለ ትፈቱ ወትትሸነህ ኣክል ሕድ እግል ተኣምረ ወእግል ትፈርገ ብእትኩ።

ጳጳስዮፍጳጳስ

15^{ይት} ሰነት ዕልብ 50


ኣርቡዕ 14 ዲሰምበር 2022

ገጽ 9



ነፈሶ ወድ ዕትማን

ድግም እብ መርገም ዕጨት



ዕጨይ ጥሉል ወፍሬ ለለፈሬ ወአግደ ለዕጨይ ዐባዩ ወካብር፡ እግል እሊ ዕጨይ እሊ ለበትክ አዳም ምን ረቢ መርገም ትመጽእ። ምክ ለትትብተክ ዕጨት - ዕጨየት - እብ ክእነ እግል ለባተከየ ትረግም። ለዕጨት እት ትወድቅ ጨጨዕ ትብል። ለመርገም ህታተ። ለባተከየ ሀዩ ለመርገም ክም ሰምዐ፡ “መርገምኪ እትኪ ትግበእ!” ልብለ። “አነ ኢአውደቅኮኪ መ ኢሰበርኮኪ ሐሪሽ ወሐርማዝ አውደቀወኪ” ልብል። ለመርገም እግል ኢትብጽሖ፡ ደአም እት ሐሪሽ ወሐርማዝ እግል ትግበእ ምኑ ክል ዶል ለባትካይ ክምሰልህ ልብል።

ወእት ለሽጋሊ ወደዕር፡ ለዐባዩ እት ሐትሐቲ ምነን፡ ለጻድቃም ወለማርያማት ሓድራም ቶም።



ወላሊ ላሊ እት ለአርእስተን ህሮማታት - መደወኖታት- ዘብጦ ልትመየው። ከእግል እለን ካብራት ወዐባዩ ለገአየ ለከቡረን ወኢበትት

ዓዳትኩ ነኦምር

ነፈሶ ወድ ዕትማን ወኢኖ ሊትማን እብ ክሰሰ ሐልየት፡ ዓዳት ወኢድጋ ትግራይት እት ወደወ በሐስ ወድራሳት፡ ክምሰልሁመ እት ደረጀት ጥባባት ለአብጸሐወ፡ ከዮም ክብት ትግራይት እግል አጅያል ለሐዲስ ጋብእ ለህለ አክትብት፡ እግል መጽእ አጅያል መትሃግየት ትግራይት ዝሕረት ዐባይ ቱ። ነፈሶ ወድ ዕትማን ወኢኖ ሊትማን ህዩ ዲብ ተእሪክ፡ ዓዳትኩ ወሕላይን ለአግደወ ዶር እብ ቀሊል ለልትረኡ ኢኮን። ከሰፍሐት ፈን ወግዳት እሊ እት አክትብት በዲር ለህለ ርዝቅ ህግያን ክሉ አዳም ጀላብ እግል ልርከቡ፡ ለአምሩ ወልትነፈሶ እቡ፡ እትሊ ዓሙድ እሊ ምነ ብዙሕ ጽበጥለ አክትብት ዲብ ነሐሬ እንቀድም እኩም ህሌን። ከእግል ዮም'መ ምን እሊ አክትብት እሊ ለአዳሌናሁ ጽበጥ ጀበእ እምለኩም፡ ክቅራኡት በኪተት፡



ኢኖ ሊትማን

ድግም ፋላት

ድግም ጋን

ጋን ጅንሱ ምን ለእብ ደነብሩ ለነፍር ሕያይት ቱ። ደአም ሕያይት ከደን ኢኮን ኢኮን ልትበህል። ለነፍስ ለአዳም ለመይት ተ ለጋን ለትገብእ ወእት አካን ለአቅብር ትነቅም ለዘይድ። ከሰማይት ጋን ለገብእ በ ገበይ እላተ፡

ለአዳም እት እዲነ እት ህለው እግል ሊደወ ሐዘ ወልተምነው ለዐለው ጋሪት፡ ወአግደ ክምሰል መርባት ለትመሰል ደአም እንዴ ኢለተመመ ምን መይቶ ወሐር እት ግራሆም ለለተምመ እሎም ምን ኢረክቦ አው ለማይት ውላድ እንዴ ኢሐድግ ምን መይት ወለዳሩ ምን ልትወረሱ፡ ምክ የታይም መዓብያይ ለአለቦም ለሐድገ፡ ወለገኡት ትግበእ ገሌ ጋመት ለሐድገ ወግራሁ መትምማይ ለኢረክቦ ለሐሳቡ ኢዐርፍ። ጋን ገብእ ወላሊ ክለ



ልሰህር - ነቅም- ልትመዩ። ወክል ዶል ሊጋኑ ኢሰክብ እት ልግሄ ነብር። ደአም ሐር ለጋሪት ለእብ ልሰህር ነብር፡ ውላዱ ክም ዐበው ምክ ምር ምን ሞላዱ ለጋሪቱ ክም አትመመ እሉ፡ ለጋኑ ሰክብ ወትም ልብል። ወእግል ለማይት ክእነ እት ግራሁ ለወዴ እሉ ክም ረክቦ ለአዳም ልብል “እገሌ ጋኑ ሰክብ ወቀሰን አው ጋኑ ገድም ሰክብ ወቀሰን” ልብል።

ሕዱግ ለኢሐድገ መ ሕዱገ ለሐወነ ላተ ጋኑ ዲመ ኢሰክብ። ወት ግርሁ ለገብእ እሉ ምን ኢረክቦ ለአዳም ልብል “እገሌ ጋኑ ኢሰክብ መ ኢሰክብ”

ወወድ ተብዐት ልግበእ መ ወለት አንሰ ክል ምርት ጋኑ እት ረአሰ ቀብሩ ልሰህር። ለማይታም እት ግርሆም ህዩ እት ለመወልዶም እኩይ እት ገብእ ክም ረአውመ ልግሁ ወጋኖም ልሰህር። ወለጋን ለገጹመ አዳም መሰል፡ ወእብ አማን ሕሳብ ለማይታም ቱ ልብል።

ድግም ሰርዐት ክሸበት እት ምድር ትግሬ

ገለድ ክሸበት ሰኒ ጸብጣም ቶም ሰብ ትግሬ፡ ወክሎምመ ሰብ ምድር ሐበሽ። ለኢትከሸብ ክምሰል ገብር ዐለቦ። ወገብር ሕላለ እንዴ ቤለው ልትግዮር። ከተብዐት ክሉ ንኡሽ ዲብ እንቱ ከሹቦ። ወእግል አዋልድመ ከሹቦን። ወእብ ለክሸበት ለጽሐት ድንግልናህን ፋርን። ወምን ኢትትከሸብ ክምሰል አመት ዐለብ። ከገድም ክሉ ለተርፎም ነኣይሽ ዲብ እንቱ

ልትከሸብ።

ሕጻን ክም ትከሸብ እት አፌት እሙ አስቅር ልቡሎ ከለስቅር። ወእብ ኮናት ሕርብት ለአፌት ረገዝ። ወእሙ ተዐልል እሉ። ወአቡሁ ክሸባት ምን ኢሐ አው ምን ዐጣልሐቱ ህይቦ። ወህተ ክም ማል ለሕጻን ትትዐለብ። ወ”ክሸባት ተህየብ” ልትበህል። ወህዩ እብ ለምዕል ህያብ ምን ብዕዳም ለመወልዱመ ረክብ። ወብላይ ጸዕደ ለብሰ። እግል ለሕጻን እናስቱ ለከሸቦ፡ ደአም እግል ወለት እሲት ትከሸብ።

ምን ሕላይ ቀዳምያም

ሰሩር አንሰ እግል ሰብ

ሰብ ለሓጥራም ወእሙራም አው ጽጉባም ለገአው ወወቀይ እሙር ለቦም፡ ክም ሞተው አንሶም ወመወልዶምመ ለገብአየ ሰራሆም። ደአም ምንመ ለሰብ ሰብ ወቀይ ገብኦ፡ አንሶም ሰሩር ምን ኢለአምረ ወመወልዶምመ ክምሰልሁ፡ ሰርሮም አለቡ። ከለሰሩር ለለአምረ ሐዳት ተን ወህተን እግል አብእስተን ወውላደን አው እግል መወልደን ሰ'ረ እብ ናዮም ላቱ። ወክል ሰሩረት እግል ለእግሉ አፍገረያህ ሌጦ በክያቦ። ወክል ሐቱ ናይ ኖሰ እንዴ አፍገረት ትሰርር። ወእዋን ለሰሩረን ገጸን ገልብቦ ወእንዴ ወቀለየ እት ልበክየ ሰ'ረ። ወአዳም ክሉ ለአተንሰየን።

ምነ ብዙሕ እት ክታብ ዓዳት ወኢድጋማት ጥቡዕ ለህለ ሰሩር ሐቱ ንርኡ ብእምነት ወድ ጅሃድ ለልትበህል በዐል መንሰዕ ቤት አብረሄ ክም ሞተ እሲቱ ክእነ እት ትብል ሰረቶ

ብእምነት ወድ ጅሃድ እብ ንዋዩ ምን ኣቤ ሀርብ ከገረዊት ለልቡሎ መስኮብ በጽሐ። ወእተ ለከራዊ ኣቤ ዐሬት ቡ። ወመለህይ ብእምነት ለከራዊ ኣቤ ክም ረኣ እግል ብእምነት ቤሎ “ብእምነት ፍገር ኣቤ መጽአ”

ወብእምነት በልሰ “እንተ ፍገር ከመሰእል አሰኔ”

ወለእናሰ ሰከ ከኔሰ። ወብእምነት ላቱ አሰቀረ ከዲብ ለከራዊ በኣ ወክልኦት ኢጋር ወምርት ፋርሰ ቀትለ። ወሐር ለከራዊ ቀትለቶ። ከእሲቱ ክእነ ሰረቱ፡

ግሉልቱ አብ ከይመ እግል ኣቤ ከሬ ለካርሺም ቀንጸ ዲቡ አመቱ እንዴ ኢደሌ ኢጋር ልትቃበበ ከሰብ ለአፍሩሰ ሐሬ ወአፍሩሰ ልሸከኮ ከእግል መናዱቅ ከሬ በዲር ልብሉካተ ለምን አፈቲት ቀሌ። ግሉልቱ አብ ከይመ እግል ኣቤ ካሪ ኢጋር ቀብዩ ከሰብ ለአፍሩሰ ሓሪ ወአፍሩሰመ ሸከከየ ከእግል መናዱቅ ካሪ እለ ናይከ ሊዴ ለእሙር እግል ነግሪ።

ካስ ዐለም 2022 ቀጠር እት 4^ይ ሳምንቱ



እት ካስ ዐለም 2022 ቀጠር 32 ደውለት ሻረከዩ። ምንን እት ዶር 16 ለሐልፊዩ ድቁባት። እብ ሐዲስ እት ዶር 8 ትከረዩ። ዶር ሰማን ለአተዩ ድወል። ክሮኤሽዩ እግል ብራዚል። አርጀንቲና ህዩ እግል ኔዘርላንድ እብ ሪጎሌታት ዲብ ለአተርፊ። ሞሮኮ እግል ፖርቱጋል ወፈረንስ እግል እንግሊዝ አትፈረዩ።

እትሊ ናይ ሞት ወሐዮት ለዐለ ጅግራታት ናይላ ሐልፈት ሳምን። ክሮኤሽዩ እግል ብራዚል 4-2 ሪጎሌ እት ቀልበት ዲበ ትልህዩ። 120 ደቂቀት 1-1 ትፈናተዩ። ሐቀሀንመ አርጀንቲና እግል ኔዘርላንድስ 4-3 (ሪጎሌ) እት

ቀልበት እት ናይ 120 ደቂቀት ትልህዩ ድቅብት። አርጀንቲና ሕሳል ማርሒት እልብዋት ምንመ ዐለት። ፈሪቅ ኔዘርላንድ እበ እት ካልኣይ ሾት ናይላ ትልህዩ ለወደዩ መትዝም ሐዲስ። እንዲ ተዓደለ ለትልህዩ 2-2 ክም ትፈግር ወደ ወእግል መትጃግራዩ አርጀንቲና እት ርዕብ ካረ።

ሞሮኮ ወፖርቱጋል እት ወደወ ትልህዩ ድቅብት ህዩ። ሞሮኮ ብዞሕ ፍረስ እት ለአበዱ። ወፖርቱጋል ደለ ጀረበወ ዲብ እዲ ሓርስ ሞሮኮ እት በርድ። ትልህዩ 1-0 እት መስለሐት ሞሮኮ ወዐለት። ፈረንሳ ወእንግሊዝ ህዩ። ክልኦት ፍረቅ ድቁባም ሰበት ቶም። ወናይ

ዲመ አክር ለዐም ሰበት ገአው። እብ ከም ሐለት ፈሪቅ ፈረንሳ በክቱ እንዲ ሰነ 2-1 ቀልበ። ሃሪ ከይን ለረክበዩን ክልኤ ሪጎሌ ሐቱ ምንን ሌጠ ሰበት ሰጀሎ። ፈሪቅ ኢንግላንድ መትፈርጃይ ትልህዩ ካስ ዐለም ናይ ዮም ዓመት ጋብእ ሀለ።

ሊሊት ሳዐት 10:00 ለተልህው አርበዕ ፈሪቅ ህዩ (ሳምሐኑ። ጀሪደት ሞግዐት ሰበት አቱት ፍገሪት ይአስአልናኩም)። ሞሮኮ ምስል ፈረንሳ ወአርጀንቲና ምስል ክሮኤሽዩ በጽሐዩን።

አሮት ሐበን አፍሪቀ ጋብእ ለህለ ፈሪቅ ሞሮኮ። ለሰልፋይ ፈሪቅ አፍሪቀ ወዐረብ ዲብ ሽብህ ነሃዩት ለበጽሐ እንዲ ትበህለ ታሪክ ሰጁል ሀለ። ልሰዕ ህዩ። ፈሪቅ ሞሮኮ እግል ፈረንሳ ቀልበ ምን ገብእ። እግል ካስ ክም ልተልሂ ወለታሪክ እብ ታሪክ ክም ደርዑ ብዝሓም መሐልሊን ርዶደት ትምኔቶም ጋብእ ለህለ ጋር ቱ።

እት ዮም 17 ዲሰምበር ሳዐት 6:00 አመቅረብ እግል ሳልሳይት ደረጃት ለልተልሂ ፍረቅ መን ክም ቱ። ክሮኤሽዩ ወአርጀንቲና።



ክምስልሁመ ፈረንሳ ወሞሮኮ ክም ካስ ለልተልህው ፍረቅ አክል ሐድ ትልህዩ እግል ለሐድዳሁ ቱ። ሳዐት 6:00 አመቅረብ እግል ዮም 18 ዲሰምበር ህዩ እግል ልትዋጅሆ ክም ቱ እመር ሀለ።

ካክር ትክህያታት ካስ ህከም ዮም ህመህት ከተዮ ከሳክ ክሳክበኽ ቱ?

ምና ዲብ ቀጠር ለትበው ሰማን እድንያይ ስታድዩማት ኮበሪት እግር ለገረመው ለሰይል ስታድዩም ወሽለፈ ኢንተርናሽናል ስታድዩም ቶም። ለእግል ሳልሳይት ደረጃት ለልተልሂ ፍረቅ እት እድንያይ ስታድዩም ሽለፈ እግል ልተልህው ቱ። እግል ካስ ለልተልህው ክልኦት ፈሪቅ ህዩ ዲበ እት አደውሐ ለህለ ለሰይል ስታድዩም እግል ልተልህው ቱ። ስታድዩም ለሰይል 89,000 መትፈርጃይ ለልኦትገሌ እት ገብእኩሉ ከደማት ለብእቱ ዘበናይ ስታድዩም ቱ። “ዮም ዓመት ካስ ዓለም እስወ

ደውለት ትነስኡም መስለኩም?” ለልብል ሰኣል ዲብ ለበልሰው ብዝሓም መታብዐት ኮበሪት እግር። “አክር ለልተልህዩ አርጀንቲና ወፈረንሳ ተን። አርጀንቲና ህዩ ካስ እግል ትንሰእ ቱ” ለልብሎ በዝሐ። እግል ሳልሳይ ደረጃት ክሮኤሽዩ ወሞሮኮ እግል ልግብእ ወሞሮኮ ሳልሳይት ደረጃት እግል ትጽበዋ ቱ ለልብሎመ ኢትሐገለው። እሊ ሳኪን ወቅት ወመቅደረትሰ ፍረቅ ለበልሰ ሰኣላት ቱ። ከዲብ ዮም 17 ወ18 ዲሰምበር ለገብእ ትልህያታት ምን ሰልፋይ አሰክ ራብዓይ ለፈግር ፍረቅ አክል-ሕድ እግል ልወደሐ እግልና ቱ።

ቂመት ካስ ዐለም ቀጠር 2022

ዮም ዓመት እት ዓሲመት ቀጠር አደውሐ ዲብ ዮም 18 ዲሰምበር 2022 ለተምም ካስ ዓለም። ለካስ ከባደቱ 6.1 ኪሎ ግራም እት ገብእ። እግል ቀልበ ፈሪቅ ቱ ለልትህዩብ። ሐቱ ምን አርበዕ ድወል በህለት ሞሮኮ። ክሮኤሽዩ። አርጀንቲና ወፈረንሳ ህዩ እግል ትትሆገሉ ክም ቱ ናይ ሐምስ ምዕል መዋዕድ ሌጠ ታርፍ ሀለ።

ዐውለ ካስ ህዩ 17 ሚልዮን ዩሮ ቱ። እሊ ምን 18 ካራት ደሀብ ለትሸቀ ካስ። ለዐቤት ጃእዘት ኮበሪት እግር እት እዲና ቱ። ለጃእዘት እትሓድ ኮበሪት እግር ዐለም በህለት ፈፋ ቱ ለመውለ ወለህይበ። እሊ ክል ሰነት እት ዘይድ ለትመጽእ ጃእዘት። ዮም ዓመት እስወ ደውለት እግል ትንሰኦቱ



ገብእ? ሐቆ ሐዳት አምዓላት ወክድ ኖሱ ለበልስ እቱ ሰኣል ቱ። እምበል እሊ ካስመ አወላይ ለፈግረ ፈሪቅ 42 ሚልዮን ዶላር። ካልኣይ ለፈግረ ፈሪቅ 30 ሚልዮን ዶላር ወሳልሳይ ለፈግረ ህዩ። 27 ሚልዮን ዶላር እንዲ ነስአው አሰክ ደውለቶም ለአቀብሎ። ራብዓይ ለፈግርመ 25 ሚልዮን ዶላር ሐዞት ቡ።

ለእመራም መተልህዮት እት ካስ ዐለም 2022 እስዎም ቶም ገብእ?

እት ካስ ዐለም 2022 ቀጠር። ብዝሓም ፕሮፌሽናል መተልህዮት ሹርካም ህለው። ምናተ እት ቀደም እለ ጋብእ ለህለ ትልህያታት። ክሮኤሽዩ። ፈረንሳ። አርጀንቲና ወሞሮኮ። ለበዝሐው ከዋክብ ምን እሹሩክ ለህለ ፍረቅ ቱ። እት ልስተት ዐስር ሕሩያም መተልህዮት ዐለም ክሮኤሽዩ ሰለሰ። ፈረንሳ ሰለሰ። አርጀንቲና ክልኦት ወሞሮኮ ክልኦት ከዋክብ ህለው እለን።

እብ ተርቲብ ምን አወላይ አሰክ ዓስራይ ርቱባም ለህለው መተልህዮት ዐለም ዲብ ካስ 2022 ቀጠር እሎም ቶም። ሊዮኔል ሚሲ (አርጀንቲና)። ኪልያን ኤምባፔ (ፈረንሳ)። ሉክ



ሞድሪች (ክሮኤሽዩ)። አሊኼር ጅሩድ (ፈረንሳ)። ዶሚኒክ ሊቫሸቪች (ክሮኤሽዩ)። ሶፍያን ዐምረባት (ሞሮኮ)። ማርሴሎ ብሮዝኪች (ክሮኤሽዩ)። ሮድሪጎ ደፖል (አርጀንቲና)። አሸረፍ ሐኪሚ (ሞሮኮ)። ወአውረሊን ሾሚኒ (ፈረንሳ) ምን አወላይ አሰክ ዓስራይ ርቱባም ህለው።





እብ ሰበት ገበይ ባቡር ኤረትርያ ሚ ተአምሮ?

2ኛ ክፍል



አዳም ወወፍሽ እብ ዐውል ረከሰ ምን ወአስክ ልትሐረክ ክምሰል ዐለ ታሪክ ለሓኬ። ምናታ እት መደት እሳትዕማር አቶብዩ ዲብ ተህጎጌ ጌሰት ወዲብ ሰነት 1974 ህዩ ክሉ ረአስ በዋረት። መሐጣታ ደመረ። ገራጃታ ዳበኣ። ሸቃላሃ እምበል ሸቅል ተርፈው። ወአስክለ ሐዲዶ እንዴ ትናቀለ እት መንፈዐት ድፍዓት ጃሽ እስትዕማር ወዐለ። ለእምር ወዕምር ለዐለት ገበይ ባቡር ኤረትርያ ህዩ ክም ይዐለት ገብአት። ሐቆ ናይ ሰላሰ ሰነት ንዳል ሸዐብ ኤረትርያ ዲብ ሰነት 1991 ኤረትርያ ክምሰል ተሐረረት ሕኩመት ኤረትርያ እብ ሕድድት ቅድረቱ እግል ክሉ ረአስ ድምርት ለዐለ ገበይ ባቡር ኤረትርያ እብ ናይ ኖስ መቅድረት አትሐሰሲተ። ለዲብ ክል-አካን ሸቱት ለዐለ ሐዲድ ዲብ ልትአፊ። ምን ሐዲስ አሌፍ እንዴ ትቤ እግል ትሸቄ አንበተት። እብ ለህበት ወጸገም ውላደ ህዩ ምን ሐዲስ እንዴ ሐሰሲት ዮም ምን ባጼዕ አስመረ አትየት ህሌት። ላመ ታርፍ ለህለ ዲብ ተሌ ሰኖታት እግል ልትመም ወገበይ ባቡር ክም በዲረ እግል ተአቅብል ሰጸዮብ ክሉ ሙዋዋን ተ።



© Bernd Seiler, Arbamba, 20.3.2011, www.FarRail.com

ገበይ ባቡር ኤረትርያ ዲብ ዘመን እስትዕማር ኢጣልያ ለአንበተት ወዲብ ታሪክ ገበይ ባቡር ዐድነ ዐቡት ተአርኤ ለዐለት ምንማታ። እብ ሰበት እስትዕማር አቶብዩ ዲብ ተህጎጌ ጌሰት። ወዲብ ደንገበ ህዩ ክሉ ረአስ በዋረት።

ህዩ ዲብ ምዕል 4 ባቡር እምበል አትካራም ምን ባጼዕ አስክ አስመረ ወምን አስመረ አስክ ባጼዕ ለአትቀብብሎ ዐለው። ብዙሕ ዐፍሽ ትረከበ ምንገብእ ህዩ ለዕልብ እብ ዕጹፍ ወስክ ዐለ።

ለትወቀለ ዕልብ በዋቢር ላኪን ዲብ አወረሐት ማርስ ወአክቶበር ናይ ሰነት 1935 ቱ ለዐለ። እትለ መደት ለህ 38 ባቡር እት 24 ሳዕት እምበል አትካራም ለአትቀብብሎ ክምሰል ዐለው ልትህደግ። እሊ ዕልብ እሊ ዲብ ታሪክ ገበይ ባቡር ኤረትርያ ለትወቀለ ዐለ እግል



© Bernd Seiler, Eritrea 12/2012, www.FarRail.com

ገበይ ባቡር ዐድነ ክምሰል እት እት ለዐል ለእምቤሉ። እብ ጋድሞታት ወአድብር ለተሐልፍ ምንማታ። ዝያደ ላታ ዲብለ ወቁል አድብር ዲብ ትትለዋሌ አብረት ዲብ ባትክ ወሐንቴ ምድር ዲብ ተአቴ። እብ ለትአጅብ ቡቶታት መሓዛት ወአወድግ ዲብ ትትዐርሬ ተ ምን መሰዋዕ አስክ አቅርደት ዝያድ 300 ኪሎሜተር ለተሄርር። ዲብ እሊ መሰለን እትለ ፍንጌ ባጼዕ ወአስመረ እትለ ህሌት ነሳፊት ሐድ 49 ኪሎሜተር እት ጣፌሕ ምድር ወእብ ርቱዕ ከዋ ዲብ ተሄርር 59 ኪሎሜተር ህዩ እብ መለዋለት ተሐልፍ። ፍንጌ ከረን ወቅርደት እትለ ህሌት መሳፊት ህዩ ሐድ 104 ኪሎሜተር ርቱዕ ወ 80 ኪሎሜተር ህዩ ሉዉሉይ አግቡይ ተሐልፍ። እሊ ህዩ እግል ኖስ ገበይ ባቡር ኤረትርያ ምን ዐቢ መትአደስ ወአሀምየት ለለህይብቱ።



ገበይ ባቡር ኤረትርያ ዲብለ ሓርያት ሰኖታት ለዐለ እለ መግዕዝ ዐፍሽ እብ ቶን ክእነ ለተሌ እግል ልትሸረሕ ቀድር። እሊ ምን ሰነት 1952 አስክ ሰነት 1957 ለዐለ አውካድ ቱ።

እሊ እት ተሐት ዲብ ሰቡረት እንርእዩ ለህሌ፤ እብ ገበይ ባቡር ኤረትርያ ምን አካን ዲብ አካን ልትነገል ለዐለ ዐፍሽ ቱ። እሊ በዳይዕ እሊ ደንክ ለዐለ በዋቢር


ልትበህል ቀድር። ዲብ ሰልፍ ሰነት 1956 ዕልብ ናይለ ዲብ ገበይ ባቡር ሸቄ ለዐለው ሸቃላ 1650 ዐለ። እሎም ሸቃላ እሎም ሰሮም እብ ዮምየት ወሰሮምመ እብ ማህየት ሸቄ ለዐለውቶም። ምስል እሊ መጃኒ ዕላጅ ወመርዲት ገብእ እሎም ዐለ።

ገበይ ባቡር ኤረትርያ ክምሰል እት ለዐለ ለረኤናሁ ምን ሰነት 1887 እግል ትሸቄ ምን ተአነብት ወሐር እግል ሸዐብ ኤረትርያ ተህይበ ለዐለት ክድመት እብ ቀሎ-ቀሎ ልትትክሕ ይዐለት።

8 ፍንቲት ሰወር ሕዘው



ሳድስ ወራር እብ ካርቱን



ለምን ገገጥ ለትሰለገ ክቡድ ተሳሕ
ደብ ጅግል ለጌደምዕ ምኒ-ጎታቲር
ፕላንቶ ጅግል ፕላንቶ እብ
እንትባህ ትሸቃ።

ሰነት	ተሰዲር	ተውሪድ	ቀበት ዐድ	ጀሚዕ
1952/53	44.105 ቶን	56.409	50.278	151.194
1953/54	60.825 *	64.201	48.649	173.675
1954/55	51.798 *	91.792	34.092	177.692
1955/56	57.307 *	99.524	37.318	194.149
1956/57	67.771 *	100.485	37.334	205.590